

ORATIONES

EX

HISTORICIS

LATINIS

COLLECTÆ.

PARS SECUNDA.



LUGDUNI,

Apud BENEDICTUM DUPLAIN;
Bibliopolam, in vico majori Mercatorio,
sub signo Aquilæ.

M. DCC. LXIV.

CUM PERMISSU.







A L I Æ
 O R A T I O N E S
 E X
 L I V I O C O L L E C T Æ .

O R A T I O
 P. S C I P I O N I S
 A D J U V E N E M P R I N C I P E M ,
 Q u u m e i s p o n s a m r e d d e r e t .

Captâ Carthagine novâ, dum recenset captivos Scipio, ad eum à militibus adducitur, eximiae formæ adulta virgo. Quam cum accepisset desponsam Principi Celtiberorum adolescenti Allucio, qui ejus amore deperiret, accersitum eum sic alloquitur.

* I.   J U V E N I S juvenem appello: què minor sit inter nos hujus sermonis verecundia. Ego, quum sponsa tua capta à militibus

* Notæ Arithmeticæ indicant paginam versionis Gallicæ.

nostris ad me ducta esset, audiremque eam tibi cordi esse, & forma faceret fidem; quia ipse, si frui liceret ludo ætatis (præsertim recto & legitimo amore) & non Respub. animum nostrum occupasset, veniam mihi dari sponsam impensius amanti vellem: tuo, cujus possum, amoris faveo. Fuit sponsa tua apud me eâdem, quâ apud foceros tuos parentesque suos, verecundiâ: servata tibi est, ut inviolatum & dignum me teque dari tibi donum posset. Hanc mercedem unam pro eo munere paciscor, amicus Populo Romano sis; & si me virum bonum credis esse, quales patrem patruumque meum jam antè hæ gentes norant, scias multos nostrî similes in civitate Romana esse: nec ullum in terris populum hodie dici posse, quem minùs tibi hostem tuisque esse velis, aut amicum malis.



O R A T I O

P. SCIPIONIS

AD SEDITIOSOS MILITES.

Octo millia militum Sucrone erant, præsidium gentibus, quæ cis Iberum incolunt, impositum. Hi licentiâ ex diuturno (ut fit) otio collectâ corrupti, quum Scipio gravi morbo implicitus esset, atque etiam falsò vulgatus esset de ipsius morte rumor, seditionem movent, Tribunos castris pellunt, imperii summam deferunt ad Albium & Atrium, principes seditionis: qui nequaquam tribuniciis contenti ornamentis, insignia summi imperii, fasces ac secures, invadunt. Postquam Scipio convaluit, nihil prius habuit, quàm ut huic malo obviàm iret. Itaque quoniam stipendium non datum ad diem seditiosi iactaverant, edicit ut ad stipendium petendum venirent Carthaginem. Postquam urbem ingressi sunt, seditionis auctores sine ullo tumultu comprehendendos curat. Multitudinem postcrâ die ad concionem vocat. Quò cum inermes venissent, ipsis à tergo se circumfundit armatus exercitus, qui Carthagine erat. Tum Scipio eos in hunc modum gravissimè objurgat.

3. **N**Unquam mihi defuturam orationem, quâ exercitum meum alloquerer, credidi: non quòd verba unquam potiùs quàm

res exercuerim , sed quia propè à pueritia in castris habitus , assueveram militaribus ingeniis. Ad vos quemadmodum loquar , nec consilium , nec oratio suppeditat : quos ne quo nomine quidem appellare debeam , scio. Cives ? qui à patria vestra descistis : an milites ? qui imperium , auspiciumque abnuistis , sacramenti religionem rupistis. Hostes ? corpora , ora , vestitum , habitum civium agnosco : facta , dicta , consilia , animos hostium video. Quid enim vos , nisi quod Illergetes & Lacetani , aut optastis aliud , aut sperastis ? Et illi tamen Mandonium atque Indibilem , regiae nobilitatis viros , duces furoris sequuti sunt : vos auspicium & imperium ad Umbrum Atrium , & Calenum Albium detulistis. Negate vos id omnes fecisse , aut factum voluisse , milites : paucorum eum furorem atque amentiam esse. Libenter credam negantibus. Nec enim ea sunt commissa , quæ vulgata in omnem exercitum sine piaculis ingentibus expiari possint. Invitus ea tanquam vulnera attingo : sed nisi tacta tractataque sanari non possunt. Equidem pulsas Hispaniâ Carthaginensibus , nullum locum totâ provinciâ , nullos homines credebam esse , ubi vita invita esset mea : sic me non solum adversus socios gesseram , sed etiam adversus hostes. In castris eni meis (quantum me opinio fefellit !) fama mortis meæ non accepta solum , sed etiam expectata est. Non quod ego vulgari facinus per omnes velim. Equidem si totum exercitum meum mortem mihi optasse crederem , hinc statim

ante oculos vestros morerer : nec me vita juvaret, invisa civibus & militibus meis. Sed multitudo omnis, sicut natura maris per se immobilis est, venti & auræ cident ; ita aut tranquillum, aut procellæ in vobis sunt : & causa atque origo omnis furoris penes auctores est ; vos contagione infestistis.

6. Qui mihi ne hodie quidem scire videamini, quò amentix progressi sitis : quid facinoris in me, quid in patriam, parentesque ac liberos vestros, quid in Deos sacramenti testes, quid adversus auspicia sub quibus militatis, quid adversus morem militiæ disciplinamque majorum, quid adversus summi imperii majestatem ausi sitis. De me ipso taceo : temerè potiùs, quàm avidè credideritis. Denique ego sum, cujus imperii tædere exercitum, minimè mirandum sit. Patria quid de vobis meruerat, quam cum Mandonio & Indibili consociando consilia prodebatis ? Quid Populus Romanus, cùm imperium ablatum ab Tribunis suffragio Populi creatis, ad homines privatos detulistis ? quum, eo ipso non contenti, si pro Tribunis illos haberetis, fasces Imperatoris vestri ad eos, quibus servus, cui imperarent, nunquam fuerat, Romanus exercitus detulistis. In prætorio teterunt Albius & Atrius : classicum apud eos cecinit : signum ab iis petatum est : sederunt in tribunali P. Scipionis : lictor apparuit : submoto incesseunt : fasces cum securibus prælati sunt. Lapides pluere, & fulmina jaci de cœlo, & insuetos fortis

animalia edere, vos portenta esse putatis: hoc est portentum, quod nullis hostiis, nullis supplicationibus, sine sanguine eorum qui tantum facinus ausi sunt, expiari possit.

7. Atque ego (quanquam nullum scelus rationem habet) tamen, ut in re nefaria, quæ mens, quod consilium vestrum fuerit, scire velim. Rhegium quondam in præsidium missa legio, interfectis per scelus principibus civitatis, urbem opulentam per decem annos tenuit: propter quod facinus rota legio, millia hominum quatuor, in foro Romæ securi percussa sunt. Sed illi primùm, non Atrium Umbrum semilixam, nominis etiam abominandi ducem, sed Decium Jubellium Tribunum militum sequuti sunt: nec cum Pyrrho, nec cum Samnitibus aut Lucanis, hostibus Populi Romani, se conjunxerunt. Vos cum Mandonio & Indibili consilia communicastis, & arma confociaturi fuistis. Illi, sicut Campani Capuam Tuscis veteribus cultoribus ademptam, Mamertini in Sicilia Messanen, sic Rhegium habituri perpetuam sedem erant: nec Populum Romanum, nec socios Populi Romani ultrò lacessituri bello. Sucronemne vos domicilium habituri eratis? ubi si vos decedens confectâ provinciâ Imperator relinquerem, Deum hominumque fidem implorare debeatis, quod non rediretis ad conjuges liberosque vestros. Sed horum quoque memoriam, sicut patriæ meique ejeceritis ex animis vestris. Viam consilii scelerati, sed non ad ultimum demeritis exequi volo.

9. Mene vivo , & cætero incolumi exercitu , cum quo ego die uno Carthaginem cepi , cum quo quatuor Imperatores , quatuor exercitus Carthaginensium fudî , fugavi , Hispaniâ expuli , vos octo millia hominum , minoris certè omnes pretii , quàm Albius & Atrius sunt , quibus vos subjecistis , Hispaniam provinciam Populo Romano erepturi eratis ? Amolior & amoveo nomen meum : nihil ultrà facilè creditam mortem meam à vobis violatus sim. Quid ? si ego morerer , mecum exspiratura Respubl. mecum casurum Imperium Populi Romani erat ? Ne istuc Jupiter Optimus Maximus sirit , urbem auspiciatò Diis auctoribus in æternum conditam , fragili huic & mortali corpori æqualem esse. Flaminio , Paulo , Graccho , Postumio Albino , M. Marcello , T. Quintio Crispino , C. Fulvio , Scipionibus meis , tot tam claris Imperatoribus uno bello absumtis , superstes est Pop. Romanus , eritque mille aliis nunc ferro , nunc morbo morientibus. Meo unius funere elata Pop. Romani esset Respublica ? Vos ipsi hîc in Hispania , patre & patruo meo , duobus Imperatoribus interfectis , Septimum Marcium ducem vobis adversus exultantes recenti victoriâ Pœnos delegistis.

10. Et sic loquor , tanquam sine duce Hispaniæ futuræ fuerint. M. Silanus eodem jure , eodem imperio mecum in provinciam missus , L. Scipio frater meus , & C. Lælius , Legatis vindices majestatis imperii decissent ? Utrùm exercitus exercitui , an duces ducibus , an dignitas , an causa comparari

poterat? Quibus si omnibus superiores essetis, arma cum Pœnis contra patriam, contra cives vestros ferretis? Africam Italiæ, Carthaginem urbi Romæ imperare velletis? Quam ob noxam patriæ? Coriolanum quondam damnatio injusta, miserum & indignum exilium, ut iret ad oppugnandam patriam, impulit: revocavit tamen à publico parricidio privata pietas. Vos qui dolor, quæ ira incitavit? Scipendiumne diebus paucis Imperatore ægro seriùs numerarum, satis digna causa fuit, cur patriæ indiceretis bellum? cur ad Illergetes descisceretis à Populo Romano? cur nihil divinarum humanarumve rerum inviolatum vobis esset? Insanistis profecto, milites: nec major in corpus meum vis morbi, quàm in vestras mentes invasit. Horret animus referre quid crediderint homines, quid speraverint, quid optaverint. Auferat omnia irrita oblivio, si potest: si non, utcunque silentium regat.

II. Non negaverim tristem atrocemque vobis visam orationem: quantum creditis facta vestra atrociora esse, quàm dicta mea? Et me ea quæ fecistis, pati æquum centetis: vos ne dici quidem omnia æquo animo ferretis? Sed ne ea quidem ipsa ultrà exprobrabuntur. Utinam tam facilè vos obliviscamini eorum, quàm ego obliviscar. Itaque quod ad vos universos attinet, si erroris poenitet, satis superque poenarum habeo. Albius Calenus, & Atrius Umber, & cæteri nefariæ seditionis auctores sanguine luent quod admiserunt, Vobis supplicii

eorum spectaculum non modò non acerbum, sed lætum etiam, si sana mens re-
diit, debet esse: de nullis enim quàm de
vobis infestius, aut inimicius consuluerunt.

ORATIO

Q. FABII MAXIMI,
IN SENATU,

Ne Scipio in Africam cum exercitu
mitteretur.

*Quum Africam novam provinciam Scipioni
Consuli extra sortem destinari homines fa-
mâ ferrent, & ipse acturum se id per
Populum diceret, si Senatus adversaretur:
ubi relatum ad Senatum est de exerciti-
bus scribendis ac provinciis, Q. Fabius
Maximus rogatus sententiam, accuratâ
oratione probare nititur non esse è Repu-
blica ut Scipio in Africam trajiciat.*

13. Scio multis vestrûm videri, P. C. rem
actam hodierno die agi, & frustra ha-
biturum orationem, qui tanquam de inte-
gra re, de Africa provincia sententiam
dixerit. Ego autem primùm illud ignoro,
quemadmodum jam certa provincia Africa
Consulis viri fortis ac strenui sit, quam
nec Senatus censuit in hunc annum pro-

vinciam esse , nec Populus jussit : deinde , si est , Consulem peccare arbitror , qui de re transacta simulando se referre , Senatum ludibrio habet , non Senatorem modò , qui de quo consultitur , suo loco dicit sententiam.

14. Atque ego certum habeo , dissentienti mihi ab ista festinatione in Africam trajiciendi , duarum rerum subeundam opinionem esse : unius , insitæ ingenio meo cunctationis , quam metum pigritiamque homines adolescentes sanè appellent , dum ne pœniteat , adhuc aliorum speciosiora primo adspectu consilia semper visa , mea usu meliora : alterius , obrectationis atque invidiæ adversus crescentem in dies gloriam fortissimi Consulis. A qua suspicione , si me neque vita acta & mores mei , neque dictatura cum quinque consulatibus , tantùmque gloriæ belli domique patræ vindicet , ut propius fastidium ejus sim , quàm desiderium ; ætas saltem liberet. Quæ enim mihi æmulatio cum eo esse potest , qui ne filio quidem meo æqualis sit ? Me Dictatorem , quum vigerem adhuc viribus , & in cursu maximarum rerum essem , recusantem nemo aut in Senatu , aut ad Populum audivit , quominus insectanti me Magistro equitum , quod sanè nunquam antè auditum erat , imperium mecum æquaretur. Rebus , quàm verbis assequi malui , ut qui aliorum judicio mihi comparatus erat , suâ mox confessione me sibi præferret : ne dum ego perfunctus honoribus , certamina mihi atque emulationes cum adolescente florentissimo

proponam : videlicet ut mihi jam vivendo , non solum rebus gerendis fesso , si huic negata fuerit , Africa provincia decernatur. Cum ea gloria , quæ parata est , vivendum atque moriendum est. Vincere ego prohibui Annibalem , ut à vobis , quorum vigent nunc vires , etiam vinci posset.

16. Illud te mihi ignoscere , P. Corneli , æquum erit , si , quum in me ipso nunquam pluris famam hominum , quàm Rempubli- cam fecerim ; ne tuam quidem gloriam bono publico præponam. Quanquam si aut bellum nullum in Italia , aut is hostis esset , ex quo victo nihil gloriæ quæreretur ; qui te in Italia retineret , etsi id bono publico faceret , simul cum bello materiam gloriæ tuæ esse ereptum videri posset. Quum verò Annibal hostis incolumi exercitu quartumdecimum annum Italiam obsideat , pœnitebit te , P. Corneli , gloriæ tuæ , si hostem eum , qui tot funerum , tot cladum nobis causa fuit , tu Consul Italiâ expuleris , & sicut penes C. Lutatium prioris Punici perpetrati belli titulus fuit , ita penes te hujus fuerit ? Nisi aut Amilcar Annibali dux est præferendus , aut illud bellum huic , aut victoria illa major clariorque , quàm hæc (modò contingat ut te Consule vincamus) futura est. Ab Drepano atque Eryce detraxisse Amilcarem , quàm Italiâ expulisse Pœnos atque Annibalem , malis ? Ne tu quidem , etsi magis partam , quàm speratam gloriam amplecteris , Hispaniâ potiùs quàm Italiâ bello liberatâ gloriatus fueris. Nondum is est Annibal , quem non magis timuisse videatur ,

quàm contempsisse, qui aliud bellum maluerit. Quin igitur ad hoc accingeris, nec per istos circuitus, ut quum in Africam trajece-
ris, sequuturum te illuc Annibalem speres,
potiùs quàm recto hinc itinere, ubi Anni-
bal est, eò bellum intendis? Egregiam istam
palmam belli Punici patrati petis? Hoc &
naturà prius est, tua quum defenteris,
aliena ire oppugnatum. Pax antè in Italia,
quàm bellum in Africa sit: & nobis priùs
decedat timor, quàm ultrò aliis inferatur.
Si utrumque tuo ductu auspicioque fieri po-
test: Annibale hinc victo, illic Carthaginem
expugna. Sin alterutra victoria novis Con-
sulibus relinquenda est; prior quum major
clariorque, tum causa insequentis fuerit.

18. Nam nunc quidem, præterquam quòd
& in Italia & in Africa duos diversos exer-
citus alere ærarium non potest; præterquam
quòd unde classes tueamur, unde commea-
tibus præbendis sufficiamus, nihil reliqui
est; periculi tandem quantum adeatur,
quem fallit? P. Licinius in Italia, P. Scipio
bellum in Africa geret. Quid, si (quod om-
nes Dii omen avertant, & dicere etiam
reformidat animus, sed quæ acciderunt, ac-
cidere possunt) & victor Annibal ire ad ur-
bem pergat; tum demum te Consulem ex
Africa, sicut Q. Fulvium à Capua arcesse-
mus? Quid, quòd in Africa quoque Mars
communis belli erit? Domus tibi tua, pater
patruusque, intra triginta dies cum exer-
citibus cæsi, documento sint; ubi per ali-
quot annos maximis rebus terrâ marique ge-
rendis amplissimum nomen apud exteras gen-

tes Populi Rom. vestræque familiæ fecerant. Dies me deficiat , si Reges Imperatoresque merè in hostium terras transgressos cum maximis cladibus suis exercituumque suorum , numerare velim. Athenienses , prudentissima civitas , bello domi relicto , auctore æquè impigro ac nobili juvene , magnâ classe in Siciliam transmissâ , unâ pugnâ navali , florentem Rempublicam suam in perpetuum affligerunt. Externa & nimis antiqua repeto. Africa eadem ista , & M. Attilius , insigne utriusque fortunæ exemplum , nobis documento sint.

19. Næ tibi , P. Corneli , quum ex alto Africam conspexeris , ludus & jocus fuisse Hispaniæ tuæ videbuntur. Quid enim simile ? Pacato mari præter oram Italiæ Galliæque vectus , Emporias in urbem sociorum classem appulisti : expositos milites , per tutissima omnia , ad socios & amicos Populi Romani , Tarraconem duxisti : ab Tarracone deinde iter per præsidia Romana : circa Iberum exercitus patris patruique tui , post amissos Imperatores , ferociores & calamitate ipsâ. Dux tumultuarius quidem ille L. Marcius , & militari suffragio ad tempus lectus , cæterum si nobilitas ac justii honores adornarent , claris Imperatoribus quâlibet arte belli par : oppugnata per summum otium Carthago , nullo trium Punicorum exercituum socios defendente. Cætera , neque ea elevo , nullo tamen modo Africo bello comparanda ; ubi non portus ullus classi nostræ apertus , non ager pacatus , non civitas socia , non Rex amicus , non

consistendi usquam locus , non procedendi. Quàcunque circumspexeris , hostilia omnia atque infesta. An Syphaci Numidisque credis? Satis sit semel creditum. Non semper temeritas est felix , & fraus fidem in parvis sibi præstruit , ut quum operæ pretium sit , cum mercede magna fallat. Non hostes patrem patruumque tuum armis priùs , quàm Celtiberi socii fraude circumvenerunt : nec tibi ipsi à Magone & Asdrubale hostium ducibus , quantum ab Indibili & Mandonio in fidem acceptis periculi fuit. Numidis tu credere potes , defectionem militum tuorum expertus? Et Syphax & Masinissa se , quàm Carthaginienses , malunt potentissimos in Africa esse : Carthaginienses , quàm quemquam alium. Nunc illos æmulatio inter sese , & omnes causæ certaminum acuunt , quia procul externus metus est. Ostende illis Romana arma , & exercitum alienigenam : jam veluti ad commune restringendum incendium concurrent.

22. Aliter iidem illi Carthaginienses Hispaniam defenderunt : aliter mœnia patriæ , templa Deùm , aras , focos defendent ; quum euntes in prælitum pavida prosequetur conjux , & parvi liberi occurrabunt. Quid porro ? Si satis confisi Carthaginienses consensu Africæ , fide sociorum Regum , mœnibus suis , quum tuo exercitûsque tui præsidio nudatam Italiam viderint , ipsi ultrò novum exercitum in Italiam aut ex Africa miserint , aut Magonem , quem à Balearibus classe transmissâ jam præter oram Ligurum Alpium vectari constat , Annibali se conjun-

gere jufferint ? Nempe in eodem terrore erimus in quo nuper fuimus , quum Asdrubal in Italiam transcendit : quem tu , qui non solum Carthaginem , sed omnem Africam exercitu tuo es clausurus , è manibus tuis in Italiam emisisti. Victum à te dices : eò quidem minùs vellem , & id tuâ , non Reipublicæ solum causâ , iter datum victo in Italiam esse.

23. Patere nos omnia quæ prospera tibi ac Reipublicæ in imperio evenere , tuo consilio assignare : adversa casibus incertis belli & fortunæ delegare. Quò melior fortiorque es , eò magis talem præsidem sibi patria atque universa Italia retinet. Non potes ne ipse quidem dissimulare , ubi Annibal sit , ibi caput atque arcem hujus belli esse : quippe qui præ te feras , eam tibi causam trajiciendi in Africam esse , ut Annibalem eò trahas. Sive igitur hîc , sive illic , cum Annibale est tibi futura res. Utrùm ergo tandem firmior eris in Africa solus , an hîc tuo collegæque exercitu conjuncto ? Ne Claudius quidem & Livius Consules tam recenti exemplo , quantum id intersit , documento sunt ? Quid Annibalem , utrùm tandem extremus angulus agri Brutii frustra jam diu poscentem ab domo auxilia , an propinqua Carthago , & tota socia Africa potentior armis virisque faciet ? Quod istud consilium est , ibi malle decernere , ubi tuæ dimidio minores copię sint , hostium multò majores , quàm ubi duobus exercitibus , adversus unum tot præliis & tam diuturnâ & gravi militiâ fessum pugnandum sit ?

24. Quàm compar consilium tuum patenti-
tis tui consilio sit, reputa. Ille Consul pro-
fectus in Hispaniam, ut Annibali ab Alpi-
bus descendenti occurreret, in Italiam ex
provincia rediit: tu, quum Annibal in Ita-
lia sit, relinquere Italiam paras; non quia
Reipub. id utile, sed quia tibi amplum &
gloriosum censes esse: sicut quum provin-
ciâ & exercitu relicto, sine lege, sine se-
natusco sulto, duabus navibus, Populi
Rom. Imperator fortunam publicam & ma-
jestatem Imperii, quæ tum in tuo capite pe-
riclitabantur, commisisti.

25. Ego P. Cornelium, P. C. Reipublicæ
nobisque, non sibi ipsi privatim creatum
Consulem existimo: exercitusque ad casto-
diam urbis atque Italiæ scriptos esse, non
quos regio more per superbiam Consules,
quod terrarum velint, trajiciant.

O R A T I O

P. CORNELII SCIPIONIS

Q. FABIO RESPONDENTIS.

25. **ET** ipse Q. Fabius principio oratio-
nis, P. C. commemoravit, in sen-
tentia sua posse obtrectationem suspectam
esse. Cujus ego rei non tam ipse ausim tan-
tum virum insimulare, quàm ea suspicio,
vitio orationis an rei, haud sanè purgata
est. Sic enim honores suos & famam rerum

gestarum extulit verbis , ad extinguendum invidiæ crimen , tanquam mihi ab infimo quoque periculum sit , ne mecum æmuletur , & non ab eo , qui , quia super cæteros excellat , quò me quoque niti non dissimulo , me sibi æquari nolit. Sic senem se perfunctum honoribus , & me infra ætatem filii etiam sui posuit ; tanquam non longius quàm quantum vitæ humanæ spatium est , cupiditas gloriæ extendatur , maximaque pars ejus in memoriam ac posteritatem promineat. Maximo cuique id accidere animo certum habeo , ut se non cum præsentibus modò , sed cum omnis ævi claris viris comparent. Equidem haud dissimulo , me tuas , Q. Fabi , laudes non assequi solum velle , sed (bonâ veniâ tuâ dixerim) si possim , etiam exsuperare. Illud nec tibi in me , neu mihi in minores natu animi sit , ut nolimus quemquam nostrî similem evadere civem. Id enim non eorum modò , quibus inviderimus , sed Reipub. & penè omnis generis humani detrimentum sit.

26. Commemoravit , quantum essem periculi aditurus , si in Africam trajicerem : ut meam quoque , non solum Reipublicæ & exercitûs vicem videretur sollicitus. Unde hæc repentè cura de me exorta ? Quum pater patruusque meus interfecti , quum duo exercitus eorum propè occisione occisi essent , quum amissæ Hispaniæ , quum quatuor exercitus Pœnorum , quatuor duces omnia metu armisque tenerent , quum quaesitus ad id bellum Imperator nemo se ostenderet , præter me , nemo profiteri nomen

ausus esset, quum mihi quatuor & viginti annos nato detulisset imperium Populus Romanus; quid ita tum nemo ætatem meam, vim hostium, difficultatem belli, patris patrique recentem cladem commemorabat? Utrum major aliqua nunc in Africa calamitas accepta est, quàm tunc in Hispania erat? An majores nunc sunt exercitus in Africa, duces plures melioresque, quàm tunc in Hispania fuerunt? An ætas mea tunc maturior bello gerendo fuit, quàm nunc est? An cum Carthaginensi hoste in Hispania, quàm in Africa bellum geri apertius est? Facile est post fusos fugatosque quatuor exercitus Punicos, post tot urbes vi captas, aut metu subactas in ditionem, post perdomita omnia usque ad Oceanum, tot Regulos, tot sævas gentes, post receptam totam Hispaniam, ita ut vestigium nullum belli reliquum sit, elevare meas res gestas: tam, Hercule, quàm si victor ex Africa redierim, ea ipsa elevare, quæ nunc retinendi mei causâ, ut terribilia eadem videantur, verbis extolluntur.

28. Negat aditum esse in Africam, negat ullos patere portus. M. Atilium captum in Africa commemorat. Tanquam M. Atilius primo accessu ad Africam offenderit. Neque recordatur, illi ipsi tam infelici Imperatori patuisse tamen portus Africæ, & res egregias primo anno gessisse, & , quantum ad Carthaginienes duces attinet, invictum ad ultimum permanuisse. Nihil igitur me isto tu exemplo terrueris. Si hoc bello, non priore, si nuper, & non annis antè qua-

draginta, ista clades accepta foret; quâ ego minùs in Africam Regulo capto, quàm Scipionibus occisis, in Hispaniam trajicerem? Nec feliciùs Xanthippum Lacedæmonium Carthagini, quàm me patriæ meæ sinerem natum esse: cresceretque mihi ex eo ipso fiducia, quòd possit in hominis unius virtute tantum momenti esse.

29. At etiam Athenienses audiendi sunt, temerè in Siciliam, omisso domi bello, transgressi. Cur ergo, quoniam Græcas fabulas enarrare vacat, non Agathoclem potiùs Syracusanum Regem, quum diu Sicilia Punico bello ureretur, transgressum in hanc eandem Africam, avertisse eò bellum unde venerat, refers?

30. Sed quid, ultrò metum inferre hosti, & ab se remoto periculo alium in discrimen adducere, quale sit, veteribus externisque exemplis admonere opus est? Majus præsentiusve ullum exemplum esse, quàm Annibal, potest? Multum interest, alienos populere fines, an tuos uri excindique videas: plus animi est inferenti periculum, quàm propulstanti. Ad hoc major ignotarum rerum est terror: bona malaque hostium ex propinquo, ingressus fines, aspicias. Non speraverat Annibal fore, ut tot in Italia populi ad se deficerent, quot defecerunt post Cannensem cladem; quantò minùs quicquam in Africa Carthaginiensibus firmum ac stabile est, infidis sociis, gravibus ac superbis dominis? Ad hoc nos etiam deserti ab sociis, viribus nostris, milite Romano, stetimus. Carthaginiensi nihil civilis robo-

ris est : mercede paratos milites habent , Afros , Numidasque , levissima fidei mutandæ ingenia. Hîc modò nihil moræ sit : unâ & trajecisse me audietis , & ardere bello Africam , & molientem hinc Annibalem , & obsideri Carthaginem. Lætiores & frequentiores ex Africa exspectate nuncios , quàm ex Hispania accipiebatis. Has mihi spes subjicit fortuna Pop. Romani , Dii fœderis ab hoste violati testes , Syphax & Masinissa Reges : quorum ego fidei ita innitar , ut bene tutus à perfidia sim. Multa quæ nunc ex intervallo non apparent , bellum aperier. Et id est viri & ducis , non deesse fortunæ præbenti se , & oblata casu flectere ad consilium.

31. Habebo , Quinte Fabi , parem , quem das , Annibalem ; sed illum potius ego traham , quàm ille me retineat. In sua terra cogam pugnare eum , & Carthago potius præmium victoriæ erit , quàm semirutæ Brutiorum castella.

32. Ne quid interim , dum trajicio , dum expono exercitum in Africa , dum castra ad Carthaginem promoveo , Respub. hîc detrimenti capiat , quod tu , Q. Fabi , quum victor totâ Italiâ volitaret Annibal , potuisti præstare , hoc , vide ne contumeliosum sit , concusso jam & penè fracto Annibale , negare , posse P. Licinium Consulem virum fortissimum præstare : qui ne à sacris absit Pontifex maximus , ideo in sortem tam longinquæ provinciæ non venit.

32. Si , Hercule , nihilo maturius hoc , quo ego cenfeo , modo perficeretur bellum :

tamen ad dignitatem Pop. Romani , famamque apud Reges gentesque externas pertinebat ; non ad defendendam modò Italiam , sed ad inferenda etiam Africæ arma , videri nobis animum esse : nec hoc credi vulgarique , quod Annibal ausus sit , neminem ducem Romanorum audere : & priore Punico bello , tum quum de Sicilia certaretur , toties Africam ab nostris exercitibus & classibus oppugnatam ; nunc quum de Italia certetur , Africam pacatam esse. Requiescat aliquando vexata tamdiu Italia ; uratur evasteturque invicem Africa. Castra Romana potiùs Carthaginis portis immineant , quàm nos iterum vallum hostium ex mœnibus nostris videamus. Africa sit reliqui belli sedes : illuc terror fugaque , populatio agrorum , defectio sociorum , cæteræ belli clades , quæ in nos per quatuordecim annos ingruerunt , vertantur.

33. Quæ ad Rempublicam pertinent , & bellum quod instat , & provincias de quibus agitur , dixisse satis est. Illa longa oratio , nec ad vos pertinens sit , si quemadmodum Q. Fabius meas res gestas in Hispania elevavit , sic & ego contrà gloriam ejus eludere , & meam verbis extollere velim. Neutrum faciam , P. C. & , si ullâ aliâ re , modestiâ certè , & temperando linguæ , adolescens senem vicero. Ita & vixi & res gessi , ut tacitus eâ opinione , quam vestrâ sponte conceptam animis haberetis , faciliè contentus essem.

O R A T I O

LOCRENSIUM LEGATORUM

IN SENATU,

De injuriis Q. Pleminii.

Locris receptis Scipio præsidium cum Q. Pleminio Legato ac duobus Tribunis militum imposuerat. Ab his Locrenses ita superbè & crudeliter habiti sunt, ut nihil omnium, quæ inopi inuisas opes potentioris faciunt, prætermissum in oppidanos sit ab duce, aut à militibus. Direpti quoque ab iis sacri Proserpinæ thesauri. Ortâ deinde inter ipsos latrones dissensione, Legatus ac Tribuni atrociam in se mutuo exempla ediderunt. Locrenses tot malis fessi Legatos Romam ad Senatum mittunt, qui ærumnas suas in hunc modum deploraverunt.

35. **S**Cio, quanti æstimentur nostræ apud vos querelæ, Patres Conscripti, plurimum in eo momenti esse, si probè sciatis, & quomodo proditi Locri Annibali sint, & quomodo pulso Annibalis præsidio, restituti in ditionem vestram. Quippe si & culpa defectionis procul à publico Consilio absit, & reditum in vestram ditionem appareat, non voluntate solum, sed ope etiam ac virtute nostrâ;

nostrâ ; magis indignemini , bonis ac fidelibus fociis tam atroces atque indignas injurias ab Legato vestro militibusque fieri. Sed ego causam utriusque defectionis nostræ in aliud tempus differendam arbitror esse , duarum rerum gratiâ : unius , ut coram P. Scipione , qui Locros recepit , omnium nobis rectè perperamque factorum testis , agatur : alterius , quodd qualescumque sumus , tamen hæc quæ passi sumus , pati non debuimus.

36. Non possumus dissimulare , P. C. nos , quum præsidium Punicum in arce nostra haberemus , multa fœda , indigna , & à Præfecto præsidii Amilcare , & ab Numidis Afrisque passos esse. Sed quid illa sunt , collata cum iis , quæ hodie patimur ? Cum bona venia , quæso , audiat , P. C. id quod invitus dicam. In discrimine est nunc humanum omne genus , utrùm vos , an Carthaginenses principes orbis terrarum videat. Si ex iis , quæ Locrenses aut ab illis passi sumus , aut à vestro præsidio nunc quum maximè patimur , æstimandum Romanum ac Punicum imperium sit ; nemo non illos sibi , quàm vos , dominos præoptet. Et tamen videte , quemadmodum Locrenses in vos animati sint. Quum à Carthaginensibus injurias tantò minores acciperemus , ad vestrum Imperatorem confugimus : quum à vestro præsidio plusquam hostilia patiamur , nusquam aliò , quàm ad vos , querelas detulimus. Aut vos respicietis perditas res nostras , P. C. aut ne ab Diis quidem immortalibus quod precemur , quicquam superest.

37. Q. Pleminius Legatus missus est cum
Pars II. B

præsidio , ad recipiendos à Carthaginienſibus Locros , & cum eodem ibi relictus eſt præſidio. In hoc Legato veſtro (dant enim animum ad loquendum liberè ultimæ miſeriæ) nec hominis quicquam eſt , P. C. præter figuram & ſpeciem ; neque Romani civis , præter habitum veſtitumque & ſonum Latinæ linguæ. Peſtis , ac bellua immanis , quales fratrum quondam , quo ab Sicilia dividimur , ad perniciem navigantium circumſediſſe fabulæ ferunt. At ſi ſcelus , libidinemque , & avaritiam ſolus ipſe exercere in ſocios veſtros ſatis haberet , unam profundam quidem voraginem tamen patientiâ noſtrâ expleremus. Nunc omnes Centuriones militeſque veſtros (adeo in promiſcuo licentiam atque improbitatem eſſe voluit) Plemios fecit : omnes rapiunt , ſpoliant , verberant , vulnerant , occidunt ; conſu- prant matronas , virgines , ingenuos raptos ex complexu parentum. Quotidie capitur urbs noſtra , quotidie diripitur ; dies nocteſque omnia paſſim mulierum puerorumque , qui rapiuntur atque aſportantur , plorati- bus ſonant. Miretur qui ſciat , quomodo aut nos ad patiendum ſufficiamus , aut illos qui faciunt , nondum tantarum injuriarum ſatietas ceperit. Neque ego exſequi poſſum , nec vobis operæ eſt audire ſingula , quæ paſſi ſumus ; communiter omnia amplectar. Nego domum ullam Locris , nego quemquam hominem expertem injuriæ eſſe : nego ullum genus ſcleris , libidinis , avaritiæ ſupereſſe , quod in ullo , qui pati potuerit , prætermiſſum ſit. Vix ratio iniri poteſt , uter caſus

civitatis sit detestabilior, quum hostes bello urbem cepere, an quum exitiabilis tyrannus vi atque armis oppressit. Omnia, quæ captæ urbes patiuntur, passi sumus, & cum maximè patimur, Patres Conscripti: omnia quæ crudelissimi atque importunissimi tyranni scelera in oppressos cives edunt, Pleminius in nos, liberosque nostros, & conjuges edidit.

39. Unum est, de quo nominatim & nos queri religio infixæ animis cogat, & vos audire & exsolvere Rempublicam vestram religione, si ita vobis videbitur, velimus, Patres Conscripti. Vidimus enim cum quantæ cærimonia non vestros solum colatis Deos, sed etiam externos accipiatis. Fanum est apud nos Proserpinæ, de cujus sanctitate templi credo aliquam famam ad vos pervenisse, Pyrrhi bello: qui cum ex Sicilia rediens Locros classe præterveheretur, inter alia sæda, quæ, propter fidem erga vos, in civitatem nostram facinora edidit, thesauros quoque Proserpinæ, intactos ad eam diem, spoliavit: atque ita pecuniâ in naves impositâ, ipse terrâ est profectus. Quid ergo evenit, Patres Conscripti? Classis postero die fœdissimâ tempestate lacerata, omnesque naves, quæ sacram pecuniam habuerunt, in littora nostra ejectæ sunt. Quâ tantâ clade edoctus tandem Deos esse superbissimus Rex, pecuniam omnem conquistam in thesauros Proserpinæ referri iussit. Nec tamen illi unquam postea prosperi quicquam evenit: pulsusque Italiâ, ignobili atque inhonestâ morte, temerè nocte ingressus Argos, occubuit.

40. Hæc quum audisset Legatus vester, Tribunique militum, & mille alia, quæ non augendæ religionis causâ, sed præsentis Deæ numine sæpe comperta nobis majoribusque nostris, referebantur; ausi sunt nihilominus sacrilegas admovere manus intactis illis thesauris, & nefandâ prædâ seiplos, ac domos contaminare suas, & milites vestros: quibus per, vos, fidem vestram, P. C. priusquam eorum scelus expietis, neque in Italia, neque in Africa quicquam rei gesseritis; ne quod piaculum commiserunt, non suo solum sanguine, sed etiam publicâ clade luant. Quanquam ne nunc quidem, P. C. aut in ducibus, aut in militibus vestris cessat ira Deæ. Aliquoties jam inter se signis collatis concurrerunt: dux alterius partis Pleminius, alterius duo Tribuni militum erant; non acrius cum Carthaginensibus, quam inter se ipsi ferro dimicaverunt; præbuis- sentque occasionem furore suo, Locros recipiendi, Annibali, ni accitus ab nobis Scipio intervenisset.

41. At, Hercule, milites contactos sacri- legio furor agitat: in ducibus ipsis punien- dis nullum Deæ numen apparuit? Imò ibi præsens maximè fuit. Virgis cæsi Tribuni ab Legato sunt. Legatus deinde insidiis Tribu- norum interceptus, præterquam quòd toto corpore laceratus, naso quoque auribusque decisis exsanguis est relictus: recreatus dein- de Legatus ex vulneribus, Tribunos militum in vincula coniectos, dein verberatos, ser- vilibusque omnibus suppliciis cruciatos tru- cidando occidit: mortuos deinde prohibuit

sepeliri. Has Dea pœnas à templi sui spoliatoribus habet : nec antè desinet omnibus eos agitare furiis , quàm reposita sacra pecunia in thesauris fuerit. Majores quondam nostri , gravi Crotoniensium bello , quia extra urbem templum est , transferre in urbem eam pecuniam voluerunt ; noctu audita ex delubro vox est , *abstinerent manus : Deam sua templa defensuram*. Quia movendi inde thesauros incussa erat religio , muro circumdare templum voluerunt ; ad aliquantum jam altitudinis excitata erant mœnia , quum subito collapsa ruinâ sunt.

42. Sed & nunc , & sæpe aliàs Dea suam sedem , suumque templum aut tutata est , aut à violatoribus gravia piacula exegit : nostras injurias nec potest , nec possit aliis ulcisci , quàm vos , Patres Conscripti. Ad vos , vestramque fidem supplices confugimus : nihil nostrâ interest , utrùm sub illo præsidio Locros esse sinatis , an irato Annibali & Pœnis ad supplicium dedatis. Non postulamus , ut extemplo nobis , ut de absente , ut indictâ causâ credatis. Veniat , coram ipse audiat , ipse diluat. Si quicquam sceleris , quod homo in homines edere potest , in nos prætermisit ; non recusamus , quin & nos , omnia eadem iterum , si pati possumus , patiamur ; & ille omni divino humanoque liberetur scelere.



O R A T I O

ANNIBALIS

AD SCIPIONEM,

De pace.

Carthaginienſes cùm moram temporis quærent, dum Annibal in Africam trajiceret, Legatos alios ad Scipionem, ut inducias facerent, alios Romam ad pacem petendam miſerant. Induciæ conſeſſæ; quas tamen, poſtquam Annibal adventabat, ruperunt expugnatis navibus quæ commeatus in caſtra Romana advehebant: Legatos quoque à Scipione Carthaginem miſſos, qui de hac injuria quererentur, propè violaverunt. Nihilominus Annibal ratus, ſi integer, quàm ſi victus peteret pacem, æquiora impetrari poſſe, colloquium cum Scipione expetit, hiſque verbis cum ad pacem hortatur.

44. **S**I hoc ita fato datum erat, ut qui primus bellum intuli Populo Romano, quique toties propè in manibus victoriam habui, is ultro ad pacem petendam venirem; lætor te mihi fortè potiſſimùm datum, à quo peterem. Tibi quoque inter multa egregia non in ultimis laudum hoc fuerit, Annibalem, cui de tot Romanis ducibus

viâtoriam Dii dedissent, tibi cessisse : teque huic bello , vestris priùs quàm nostris claudibus insigni , finem imposuisse. Hoc quoque ludibrium casûs ediderit fortuna , ut cum patre tuo Consule ceperim arma , cum eodem primùm Romano Imperatore signa contulerim ; ad filium ejus inermis ad pacem petendam veniam.

45. Optimum quidem fuerat , eam patribus nostris mentem datam ab Diis esse , ut & vos Italiæ , & nos Africæ Imperio contenti essemus. Neque enim ne vobis quidem Sicilia atque Sardinia satis digna pretia sunt pro tot classibus , tot exercitibus , tot tam egregiis amissis ducibus. Sed præterita magis reprehendi possunt , quàm corrigi. Ita aliena appetivimus , ut de nostris dimicaremus , nec in Italia solùm vobis bellum , nobis in Africa esset : sed & vos in portis vestris propè ac mœnibus signa armaque hostium vidistis ; & nos ab Carthagine fremitum castrorum Romanorum exaudimus. Quod igitur nos maximè abominaremur , vos ante omnia optaretis ; in meliore vestra fortuna de pace agitur. Agimus ii , quorum & maximè interest pacem esse , & qui quodcunque egerimus , ratum civitates nostræ habituræ sint. Animo tantùm nobis opus est non abhorrente à quietis consiliis.

46. Quod ad me attinet , jam ætas , senem in patriam revertentem unde puer profectus sum , jam secundæ , jam adversæ res ita erudierunt , ut rationem sequi , quàm fortunam malim. Tuam & adolescentiam , & perpetuam felicitatem , ferociora utraque

quàm quietis opus est consiliis , metuo. Non temerè incerta casuum reputat , quem fortuna nunquam decepit. Quod ego fui ad Thrasymenum , ad Cannas , id tu hodie es. Vixdum militari ætate imperio accepto , omnia audacissimè incipientem nusquam fefellit fortuna. Patris & patruï persecutus mortem , ab calamitate vestræ domûs decus. insigne virtutis pietatisque eximiæ cepisti : amissas Hispanias recuperasti , quatuor inde Punicis exercitibus pulsus : Consul creatus , quum cæteris ad tutandam Italiam parum animi esset , transgressus in Africam , duobus hîc exercitibus cæsis , binis eâdem horâ captis simul incensisque castris , Syphace potentissimo Rege capto , tot urbibus regni ejus , tot nostri Imperii ereptis , me , sextum decimum jam annum , hærentem in possessione Italiæ detraxisti. Potest victoriam malle , quàm pacem , animus. Novi vobis spiritus magnos magis quàm utiles : & mihi talis aliquando fortuna affulsit. Quòd si in secundis rebus bonam quoque mentem darent Dii , non ea solùm quæ evenissent , sed etiam ea quæ evenire possent , reputaremus. Ut omnium obliviscaris aliorum , satis ego documenti in omnes casus sum. Quem modò castris inter Anienem atque urbem vestram positis , ac jam propè scandentem mœnia Romana videras : hîc cernis , duobus fortissimis viris fratribus , clarissimis Imperatoribus orbatum , ante mœnia propè obsessæ patriæ , quibus terrui vestram urbem , ea pro mea deprecantem.

48. MAXIMÆ cuique fortunæ minimè

credendum est. In bonis tuis rebus, nostris dubiis, tibi ampla ac speciosa danti est pax; nobis petentibus magis necessaria quàm honesta. Melior tutiorque est certa pax, quàm sperata victoria; hæc in tua, illa in Deorum manu est. Ne tot annorum felicitatem in unius horæ dederis discrimen. Cùm tuas vires, tum vim fortunæ, Martemque belli communem propone animo. Utrinque ferrum; corpora humana erunt. Nusquam minùs quàm in bello eventus respondent. Non tantùm ad id quod datâ pace jam habere potes, si prælio vincas, gloriæ adjeceris; quantùm ademeris, si quid adversi eveniat. Simul parta ac sperata decora unius horæ fortuna evertere potest. Omnia in pace jungenda tuæ potestatis sunt, P. Corneli: tunc ea habenda fortuna erit, quam Dii dederint. Inter pauca felicitatis virtutisque exempla M. Atilius quondam in hac eadem terra fuisset, si victor pacem petentibus dedisset patribus nostris: sed non statuendo tandem felicitati modum, nec cohibendo efferentem se fortunam, quantò altiùs elatus erat, eò fœdiùs corruit.

49. Est quidem ejus, qui dat, non qui petit, conditiones dicere pacis: sed forsitan non indigni simus, qui nobismetipsis multam irrogemus. Non recusamus, quin omnia propter quæ bellum initum est, vestra sint; Sicilia, Sardinia, Hispania, quicquid insularum toto inter Africam Italiamque continetur mari. Carthaginienfes iaculusi Africæ littoribus, vos (quando ita

Diis placuit) externa etiam terrâ marique videamus regentes Imperia. Haud negaverim, propter non nimis sincerè petitam aut expectatam nuper pacem, suspectam esse vobis Punicam fidem. Multùm per quos petita sit, ad fidem tuendæ pacis pertinet, Scipio. Vestri quoque (ut audio) patres non nihil etiam ob hoc, quia parum dignitatis in legatione erat, negaverunt pacem. Annibal peto pacem: qui neque peterem nisi utilem crederem, & propter eandem utilitatem tuebor eam, propter quam petii. Et quemadmodum, quia à me bellum cœptum est, ne quem ejus pœniteret, quoad ipsi invidêre Dii, præstiti: ita annitar, ne quem pacis per me partæ pœniteat.

O R A T I O

S C I P I O N I S

ANNIBALI RESPONDENTIS.

31. **N**ON me fallebat, Annibal, adventûs tui spe Carthaginienses & præsentem induciarum fidem, & spem pacis turbasse: neque tu id sanè dissimulas, qui de conditionibus superioribus pacis omnia subtrahas, præter ea, quæ jampridem in nostra potestate sunt. Cæterùm, sicut tibi curæ est, sentire cives tuos, quanto per te onere levantur: sic mihi laborandum est, ne quæ tunc pepigerunt, hodie subtracta

ex conditionibus pacis , præmia perfidiæ habeant. Indigni , quibus eadem pateat conditio , ut etiam profit vobis fraus , petitis. Neque patres nostri priores de Sicilia , neque nos de Hispania fecimus bellum. Et tunc Mamertinorum sociorum periculum , & nunc Sagunti excidium nobis pia ac iusta induerunt arma. Vos laceffisse , & tu ipse fateris , & Dii testes sunt : qui & illius belli exitum secundum jus fasque dederunt , & hujus dant & dabunt. Quod ad me attinet , & humanæ infirmitatis memini , & vim fortunæ reputo , & omnia quæcunque agimus , subjecta esse mille casibus scio. Cæterum , quemadmodum superbe & violenter me faterer facere , si priusquam in Africam trajecissem , te tuâ voluntate cedentem Italiâ , & imposito in naves exercitu ipsum venientem ad pacem petendam aspernarer ; sic nunc , quum propè manu confertâ resitantem ac tergiversantem in Africam attraxerim , nullâ sum tibi verecundiâ obstrictus. Proinde si quid ad ea , in quæ tum pax conventura videbatur , (quæ sint , nosti) mulctæ navium cum comœatu per inducias expugnatarum , Legatorumque violatorum , adjicitur ; est quod referam ad Consilium. Sin illa quoque gravia videntur , bellum parate , quoniam pacem pati non potuistis.



O R A T I O
M. PORCII CATONIS
CONSULIS,

Pro lege Oppia.

C. Oppius Tribunus plebis, in medio ardore Punici belli legem contra luxuriam mulierum tulerat. Bello finito, de hac lege abroganda M. Fundanius & L. Valerius Tribuni plebei ad plebem ferebant. Matronæ omnes vias urbis, aditusque in forum obsidebant, orantes ut sibi pristinus ornatus redderetur. At M. Porcius Cato Consul pro lege, quæ abrogabatur, ita disseruit.

53. **S**I in sua quisque nostrum matre familiæ, Quirites, jus & majestatem viri retinere instituisset, minus cum universis foeminis negotii haberemus. Nunc domi victa libertas nostra impotentiam muliebri, hic quoque in foro obteritur & calcatur: & quia singulas sustinere non potuimus, universas horremus. Equidem fabulam & fictam rem ducebam esse, virorum omne genus in aliqua insula conjuratione muliebri ab stirpe sublatum esse. Ab nullo genere non æquè sumum periculum est, si cœtus & consilia, & secretas consultationes esse sinas.

54. Atque ego vix statuere apud animum meum possum, utrùm pejor ipsa res, an pejore exemplo agatur. Quorum alterum ad nos Consules, reliquosque Magistratus; alterum ad vos, Quirites, magis pertinet. Nam utrùm è Republica sit, necne, id quod ad vos fertur, vestra existimatio est, qui in suffragium ituri estis. Hæc consternatio muliebris, sive suâ sponte, sive auctoribus vobis, M. Fundani, & L. Valeri, facta est, haud dubiè ad culpam Magistratuum pertinens, nescio vobis, Tribuni, an Consulibus magis sit deformis: vobis, si fœminas ad concitandas tribunicias seditiones jam adduxistis: nobis, si ut plebis quondam, sic nunc mulierum secessione leges accipiendæ sunt.

55. Equidem non sine rubore quodam paulò antè per medium agmen mulierum in forum perveni. Quòd nisi me verecundia singularum magis majestatis & pudoris, quàm universalum tenuisset, ne compellatæ à Consule viderentur, dixissem: „ Qui hic mos est in publicum procurren- „ di, & obsidendi vias, & viros alienos „ appellandi? Istud ipsum suos quæque „ domi rogare non potuistis? An blandio- „ res in publico quàm in privato, & alie- „ nis, quàm vestris estis? Quanquam ne „ domi quidem vos, si sui juris finibus „ matronas contineret pudor, quæ leges „ hîc rogarentur abrogarenturve, curare „ decuit. „

56. Majores nostri, nullam ne privatam quidem rem agere fœminas sine auctore

voluerunt ; in manu esse parentum , fratrum , virorum. Nos (si Diis placet) jam etiam Rempubl. capeffere eas patimur , & foro quoque , & concionibus , & comitiis immifceri. Quid enim nunc aliud per vias & compita faciunt , quàm quòd aliæ rogationes Tribunorum plebis fuadent , aliæ legem abrogandam cenfent ? Date frænos impotenti naturæ , & indomito animali ; & fperate ipfas modum licentiæ facturas , nifi vos faciatis.

56. Minimum hoc eorum eft , quæ ini-quo animo fœminæ fibi aut moribus aut legibus injuncta patiuntur. Omnium rerum libertatem , imò licentiam (fi vera dicere volumus) defiderant. Quid enim , fi hoc expugnauerint , non tentabunt ? Recenfete omnia mûliebria jura , quibus licentiam earum alligaverint majores noftri , per quæque subjecerint viris : quibus omnibus con-strictas vix tamen continere poteftis. Quid fi carpere fingula & extorquere , & ex-quiri ad extremum viris patiemini : tole-rabiles vobis eas fore creditis ? Extemplo , fimul pares effe cœperint , superiores erunt.

57. At , Hercule , ne quid novum in eas rogetur , recufant : non jus , fed inju-riam deprecantur. Imò , ut , quam acce-piftis , juffiftis fuffragiis veftris legem , quam ufu tot annorum & experiendo comprobaf-tis , hanc ut abrogetis : id eft , ut unam tollendo legem , cæteras infirmetis. Nulla lex fatis commoda omnibus eft : id modò quæritur , fi majori parti , & in fummam prodeft. Si , quod cuiquam privatim offi-

ciet jus , id destruet ac demolietur , quid attinebit universos rogare leges , quas mox abrogare , in quos latæ sunt , possint ?

58. Volo tamen audire quid sit , propter quod matronæ consternatæ procurret in publicum , ac vix foro se & concione abstineant. Ut captivi ab Annibale redimantur , parentes , viri , liberi , fratres earum ? Procul abest , absitque semper talis fortuna Reipublicæ. Sed tamen quum fuit , negastis hoc piis precibus earum. At non pietas , nec sollicitudo pro suis , sed religio congregavit eas. Matrem Idæam à Pessinunte ex Phrygia venientem accepturæ sunt. Quid honestum dictu saltem seditioni prætenditur muliebri ? “ Ut auro & purpurâ ful-
 „ geamus , inquit : ut carpentis , festis pro-
 „ festisque diebus , velut triumphantes de
 „ legē victa & abrogata , & captis &
 „ ereptis suffragiis vestris , per urbem ve-
 „ stemur : ne ullus modus sumptibus , ne
 „ luxuriæ sit. „

59. Sæpe me querentem de fœminarum , sæpe de virorum , nec de privatorum modò , sed etiam Magistratuum sumptibus audistis ; diversisque duobus vitiis , avaritiâ & luxuriâ civitatem laborare : quæ pestes omnia magna Imperia everterunt. Hæc ego , quò melior lætiorque in dies fortuna Reip. est , Imperiumque crescit , & jam in Græciam Asiamque transcendimus , omnibus libidinum illecebris repletas , & regias etiam attrectamus gazas : eò plus horreo , ne illæ magis res nos ceperint , quàm nos illas. Infesta , mihi credite , signa ab Syracusis

illata sunt huic urbi. Jam nimis multos audio Corinthi & Athenarum ornamenta laudantes mirantesque, & antefixa fictilia Deorum Romanorum ridentes. Ego hos malo propitios Deos; & ita spero futuros, si in suis manere sedibus patiemur.

60. Patrum nostrorum memoriâ per Legatum Cineam Pyrrhus, non virorum modò, sed etiam mulierum animos donis tentavit. Nondum lex Oppia ad coërcendam luxuriam muliebrem lata erat: tamen nulla accepit. Quam causam fuisse censetis? Eadem fuit, quæ majoribus nostris, nihil de hac re lege sancienti: nulla erat luxuria, quæ coërceretur. Sicut antiè morbos necesse est cognitos esse, quàm remedia eorum: sic cupiditates priùs natæ sunt quàm leges, quæ iis modum facerent. Quid legem Liciniam excitavit de quingentis jugeribus, nisi ingens cupido agros continuandi? Quid legem Cinciam de donis & muneribus, nisi quia vestigalis jam & stipendiaria plebes esse Senatui cœperat? Itaque minimè mirum est, nec Oppiam, nec aliam ullam tum legem desideratam esse, quæ modum sumptibus mulierum faceret: quum aurum & purpuram data & oblata ultrò non accipiebant. Si nunc cum illis donis Cineas urbem circumiret, stantes in publico invenisset quæ acciperent.

61. Atque ego nonnullarum cupiditatum ne causam quidem aut rationem inire possum. Nam ut quod alii liceat, tibi non licere, aliquid fortasse naturalis aut pudoris, aut indignationis habeat: sic æquato

omnium cultu, quid unaquæque vestrum veretur ne in se conspiciatur? Pessimus quidem pudor est vel parcimoniæ, vel paupertatis: sed utrumque lex vobis demit, quum id quod habere non licet, non habetis. "Hanc, inquit, ipsam exæquationem non fero, illa locuples. Cur non insignis auro & purpurâ conspicior? cur paupertas aliarum sub hac legis specie latet, ut quod habere non possunt, habituræ, si liceret, fuisse videantur? Vultis hoc certamen uxoribus vestris injicere, Quirites, ut divites id habere velint, quod nulla alia possit; pauperes, ne ob hoc ipsum contemnantur, supra vires se extendant? Næ, simul pudere, quod non oportet, coeperit; quod oportet, non pudebit. Quæ de suo poterit, parabit; quæ non poterit, virum rogabit. Miserum illum virum, & qui exoratus, & qui non exoratus erit! quum quod ipse non dederit, datum ab alio videbit. Nunc vulgò alienos viros rogant, & quod majus est, legem & suffragia rogant, & à quibusdam impetrant, adversus te & rem tuam & liberos tuos inexorabiles. Simul lex modum sumptibus uxoris tuæ facere desierit, tu nunquam facies. Nolite eodem loco existimare, Quirites, futuram rem, quo fuit antequam lex de hoc ferretur. Et hominem improbum non accusari tutius est, quàm absolvi: & luxuria non mota tolerabilior esset, quàm erit nunc, ipsis vinculis, sicut fera bestia, irritata, deinde emissæ. Ego nullo modo abrogandam legem Oppiam censeo: vos quod faxitis, Deos omnes fortunare velim.

O R A T I O

L. V A L E R I I ,

TRIBUNI PLEBIS,

Pro mulieribus , contra legem Oppiam.

63. SI privati tantummodo ad suadendum dissuadendumque id quod à nobis rogatur , processissent , ego quoque quum satis dictum pro utraque parte existimarem , tacitus suffragia vestra expectassem. Nunc quum vir gravissimus Consul M. Porcius , non auctoritate solùm , quæ tacita satis momenti habuisset , sed oratione etiam longâ & accuratâ infectatus sit rogationem nostram ; necessum est paucis respondere. Qui tamen plura verba in castigandis matronis , quàm in rogatione nostra dissuadenda consumsit ; & quidem ut in dubio poneret , utrùm id quod reprehenderet , matronæ suâ sponte , an nobis auctoribus fecissent. Rem defendam , non nos : in quos jecit magis hæc Consul verbo tenus , quàm ut re insinularet.

64. Cœtum & seditiones , & interdum secessionem muliebrem appellavit , quòd matronæ in publico vos rogassent , ut legem in se latam per bellum temporibus duris , in pace & florente ac beatâ Repub. abrogaretis. Verba magna , quæ rei augendæ

causâ conquirantur , & hæc & alia esse scio : & M. Catonem Oratorem non solum gravem , sed interdum etiam trucem esse scimus omnes , quum ingenio sit mitis. Nam quid tandem novi matronæ fecerunt , quod frequentes in causa ad se pertinente in publicum processerunt ? Nunquam ante hoc tempus in publico apparuerunt ? Tuas adversus te Origines revolvam. Accipe quoties id fecerint , & quidem semper bono publico. Jam à principio , regnante Romulo , quum Capitolio à Sabinis capto , medio in foro signis collatis dimicaretur ; nonne intercursu matronarum inter acies duas prælium sedatum est ? Quid ? Regibus exactis , quum Coriolano Marcio duce legiones Volscorum castra ad quintum lapidem posuissent ; nonne id agmen , quo obruta hæc urbs esset , matronæ averterunt ? Jam urbe captâ à Gallis , aurum , quo redempta urbs est , nempe matronæ consensu omnium in publicum contulerunt. Proximo bello (ne antiqua repetam) nonne & quum pecuniâ opus fuit , viduarum pecuniæ adjuverunt ærarium , & quum Dii quoque novi ad opem ferendam dubiis rebus arcesserentur , matronæ universæ ad mare profectæ sunt , ad matrem Idæam accipiendam ? Dissimiles , inquit , causæ sunt. Nec mihi causas æquare propositum est : nihil novi factum , purgare satis est. Cæterum , quod in rebus ad omnes pariter viros fœminasque pertinentibus fecisse eas nemo miratus est , in causa propriè ad ipsas pertinente miramur fecisse ? Quid autem fecerunt ? Superbas medius fi-

dus aures habemus , si , quum domini fervorum non fastidiant preces , nos rogari ab honestis fœminis indignamur.

66. Venio nunc ad id de quo agitur , in quo duplex Consulis oratio fuit. Nam & legem ullam omnino abrogari est indignatus : & eam præcipuè legem , quæ luxuriæ muliebris coërcendæ causâ lata esset. Et illa communis pro legibus , visa consularis oratio est : & hæc adversus luxuriam , severissimis moribus conveniebat. Itaque periculum est , nisi quid in utraque re vani sit , docuerimus , ne quis error vobis offundatur.

67. Ego enim , quemadmodum ex his legibus , quæ non in tempus aliquod , sed perpetuæ utilitatis causâ in æternum latæ sunt , nullam abrogari debere fateor , nisi quam aut usus coarguit , aut status aliquis Reipub. inutilem fecit : sic quas tempora aliqua desiderarunt leges , mortales (ut ita dicam) & temporibus ipsis mutabiles esse video. Quæ in pace latæ sunt , plerùmque bellum abrogat ; quæ in bello , pax : ut in navis administratione , alia in secundam , alia in adversam tempestatem usui sunt.

68. Hæc quum ita naturâ distincta sint , ex utro tandem genere ea lex esse videtur , quam abrogamus ? An vetus regia lex , simul cum ipsa urbe nata ? An (quod secundum est) à Decemviris ad condenda jura creatis in duodecim tabulis scripta ? sine qua quum majores nostri non existimarint matronale decus servari posse , nobis quoque verendum sit , ne cum ea pudorem sanctitatem-

que foeminarum abrogemus ? Quis igitur nescit , novam istam legem esse , Q. Fabio , Ti. Sempronio Consulibus viginti annis antè latam ? sine qua quum per tot annos matronæ optimis moribus vixerint , quod tandem , ne abrogatâ eâ effundantur ad luxuriam , periculum est ? Nam si ista lex ideo lata esset , ut finiret libidinem muliebrem ; verendum foret , ne abrogata incitaret. Cur sit autem lata , ipsum indicabit tempus. Annibal in Italia erat victor ad Cannas : jam Tarentum , jam Arpos , jam Capuam habebat : ad urbem Romam admoturus exercitum videbatur : defecerant socii : non milites in supplementum , non socios navales ad classem tuendam , non pecuniam in ærario habebamus : servi , quibus arma darentur , ita ut pretium pro iis bello perfecto dominis solveretur , emebantur : in eandem diem pecuniæ , frumentum & cætera quæ belli usus postulabant , præbenda publicani se conducturos professi erant : servos ad remum , numero ex censu constituto , cum stipendio nostro dabamus , aurum & argentum omne , ab Senatoribus ejus rei initio orto , in publicum conferebamus : viduæ & pupilli pecunias suas in ærarium deferabant : cautum erat , quò ne plus auri & argenti facti , quò ne plus signati argenti & æris domi haberemus. Tali tempore in luxuria & ornatu matronæ occupatæ erant , ut ad eam coërcendam lex Oppia desiderata sit ? quum , quia Cereris sacrificium lugentibus omnibus matronis intermissum erat , Senatus finire luctum triginta diebus jussit.

Cui non apparet, inopiam & miseriam civitatis, quia omnium privatorum pecuniæ in usum publicum vertendæ erant, istam legem scripsisse, tandiu mansuram, quandiu causa scribendæ legis mansisset? Nam si quæ tunc temporis causâ aut decrevit Senatus, aut Populus iussit, in perpetuum servari oportet, cur pecunias reddimus privatis? cur publica præsentî pecuniâ locamus? cur servi, qui militent, non emuntur? cur privati non damus remiges, sicut tunc dedimus?

70. Omnes alii Ordines, omnes homines mutationem in meliorem statum Reipub. sentient: ad conjuges tantum nostras, pacis & tranquillitatis publicæ fructus non perveniet? Purpurâ viri utemur, prætextati in magistratibus, in sacerdotiis: liberi nostri prætextis purpurâ togis utentur: Magistratibus in coloniis municipiisque, hîc Romæ infimo generi, magistris vicorum, togæ prætextæ habendæ jus permittemus; nec id ut vivi solum habeant tantum insigne, sed etiam ut cum eo crementur mortui: fœminis duntaxat purpuræ usum interdicemus? & quum tibi viro liceat purpurâ in veste stragula uti, matrem familiæ tuam purpureum amiculum habere non fines? & equus tuus speciosius instratus erit, quàm uxor vestita? Sed in purpura, quæ teritur, absumitur, injustam quidem, sed aliquam tamen causam tenacitatis video: in auro verò, in quo præter manûs pretium nihil intertrimenti fit, quæ malignitas est? Præsidium potius in eo est & ad publicos & ad privatos usus, sicuti experti estis.

71. Nullam æmulationem inter se singularum, quando nulla haberet, esse aiebat. At, Hercule, universis dolor & indignatio est, quum sociorum Latini nominis uxoribus vident ea concessa ornamenta, quæ sibi adempta sint; quum insignes eas esse auro & purpurâ, quum illas vehi per urbem, se pedibus sequi: tanquam in illarum civitatibus, non in sua Imperium sit. Virorum hoc animos vulnerare posset: quid mulierularum censeatis, quas etiam parva movent? Non magistratus, nec sacerdotia, nec triumphi, nec insignia, nec dona aut spolia bellica his contingere possunt. Munditiæ, & ornatus, & cultus, hæc fœminarum insignia sunt: his gaudent & gloriantur: hunc mundum muliebrem appellarunt majores nostri. Quid aliud in luctu, quàm purpuram atque aurum deponunt? quid, quum eluxerunt, sumunt? quid in gratulationibus supplicationibusque, nisi excellentiorem ornatum adjiciunt?

72. Scilicet si legem Oppiam abrogaveritis, non vestri arbitrii erit, si quid ejus vetare volueritis, quod nunc lex vetat: minùs filix, uxores, sorores etiam quibusdam in manu erunt. Nunquam salvis suis exuitur servitus muliebris; & ipsæ libertatem, quam viduitas & orbitas facit, detestantur. In vestro arbitrio suum ornatum, quàm in legis, malunt esse: & vos in manu & tutela, non in servitio debetis habere eas; & malle patres vos aut viros, quàm dominos dici. Invidiosis nominibus utebatur modò Consul; seditionem muliebrem & se-

cessionem appellando. Id enim periculum est, ne Sacrum montem, sicut quondam irata plebs, aut Aventinum capiant. Patientum huic infirmitati est, quodcunque vos censueritis. Quò plus potestis, eò moderatiùs imperio uti debetis.

ORATIO

SCIPIONIS AFRICANI

AD LEGATUM ANTIOCHI.

Antiochum in Asiam cedentem secuti erant Romani. Ad eos, Consulemque L. Scipionem Rex Legatum de pace mittit. Africanus cum fratre ad id bellum venerat: cujus filius paulò antè captus in potestate Regis erat. Unde & in eo maximam spem habebat Antiochus impetrandæ pacis. Legatus igitur, postquam conditiones à se allatas repudiari à Consule videbat, P. Scipionem adit. Omnium primùm filium ei sine pretio redditurum Regem dicit: deinde & auri pondus ingens pollicetur, si per eum Rex pacem impetrasset. Ad ea Scipio.

73. **Q**Uòd Romanos omnes, quòd me, ad quem missus es, ignoras, minùs miror, quum te fortunam ejus à quo venis, ignorare cernam. Lyfimachia tenenda erat, ne Chersonesum intraremus; aut
ad

ad Helleſpontum obſiſtendum , ne in Aſiam trajiceremus , ſi pacem tanquam ab ſollicitis de belli eventu petituri eratis. Conceſſo verò in Aſiam tranſitu , & non ſolùm frænīs , ſed etiam jugo accepto , quæ diſceptatio ex æquo , quum imperium patiendum ſit , relicta eſt ? Ego ex munificentia regia maximum donum filium habebo : aliis , Deos precor , ne unquam fortuna egeat mea : animus certè non egebit. Pro tanto in me munere gratum me eſſe in ſe ſentiet , ſi privatam gratiam pro privato beneficio deſiderabit. Publicè nec habebo quicquam ab illo , nec dabo. Quod in præſentia dare poſſim , fidele conſilium eſt. Abi , nuncia meis verbis , bello abſiſtat ; pacis conditionem nullam recuſet.

O R A T I O

LEGATORUM ANTIOCHI,

Pacem à Romanis poſtulantium.

Antiochus ingenti prælio victus , Legatos ad Romanos mittit , cum his mandatis , ut nullam conditionem pacis recuſent. Legati ita verba faciunt.

75. **N**on tam quid ipſi dicamus , habemus , quàm ut à vobis quæramus , Romani , quo piaculo expiare errorem Regis , pacem veniamque impetrare à victo.

Pars II.

C

ribus possimus. Maximo semper animo victis Regibus populisque ignovistis. Quanto majore & placatiore animo decet vos facere in hac victoria, quæ vos dominos orbis terrarum fecit? Positis jam adversus omnes mortales certaminibus, haud secus quam Deos, consulere & parcere vos generi humano oportet.

O R A T I O

* P. SCIPIONIS

LEGATIS ANTIOCHI

RESPONDENTIS.

76. **R**Omani ex iis quæ in Deum immortalium potestate erant, ea habemus, quæ Dii dederunt: animos, qui nostræ mentis sunt, eosdem in omni fortuna gessimus, gerimusque: neque eos secundæ res extulerunt, nec adversæ minuerunt. Ejus rei, ut alios omittam, Annibalem vestrum vobis darem testem, nisi vos ipsos dare possem. Posteaquam Hellespontum trajecimus, priusquam castra regia, priusquam aciem videremus, quum communis Mars & incertus belli eventus esset, de pace vobis agentibus, quas pares paribus ferebamus conditiones, easdem nunc victores victis ferimus. Europâ abstinete; Asiâque omni, quæ cis Taurum montem est, decedite. Pro

impensis deinde in bellum factis quindecim millia talentum Euboïcorum dabit; quingenta præsentia, duo millia & quingenta, quum Senatus Populusque Romanus pacem comprobaverint, millia deinde talentum per duodecim annos. Eumeni quoque reddi quadraginta talenta, & quod frumenti reliquum ex eo, quod patri debitum est, placet. Hæc quum pepigerimus, facturos vos ut pro certo habeamus, erit quidem aliquod pignus, si obsides viginti nostro arbitratus dabit: sed nusquam satis liquebit nobis, ibi pacem esse Populo Romano, ubi Annibal erit. Eum ante omnia deprecamur. Thoan-tem quoque Ætolum, concitorem Ætolici belli, qui & illorum fiduciâ vos, & vestra illos in nos armavit, dedetis: & cum eo Mnasi-machum Arcanana, & Chalcidenses Philonem & Eubulidam. In deteriore sua fortuna pacem faciet Rex, quia serius facit, quam facere potuit. Si nunc moratus fuerit, sciat Regum majestatem difficilius ab summo fastigio ad medium detrahi, quam à mediis ad ima præcipitari.



O R A T I O
LEGATORUM RHODIORUM
I N S E N A T U ,

Ut Græcis Asiæ civitatibus libertas
daretur.

Romanis in bello adversus Antiochum Eumenes, Rex Pergami, Rhodique, sortem ac fidelem operam navaverant. Alius partem spoliis Antiochi, in officiorum mercedem, alii vero civitates Græcas eidem Antiocho ademptas, in libertatem vindicari, Romanos exposcebant. Rhodiorum Legatorum oratio ad commovendos Romanos potentissima.

19. **N**ihil nobis totâ nostrâ actione, Patres Conscripti, neque difficilius, neque molestius est, quàm quòd cum Eumene nobis disceptatio est: cum quo uno maximè Regum, & privatum singulis, &, quod magis nos movet, publicum civitati nostræ hospitium est. Cæterum non animi nostri, Patres Conscripti, nos, sed rerum natura, quæ potentissima est, disjungit; ut nos liberi etiam aliorum libertatis causam agamus; Reges serva omnia, & subiecta imperio suo esse velint. Utcumque tamen res se habet, magis verecundia nostra adversus

Regem nobis obstat, quàm ipsa disceptatio aut nobis impedita est, aut vobis perplexam deliberationem præbitura videtur. Nam si aliter socio atque amico Regi, & bene merito hoc ipso in bello, de cujus præmiis agitur, honos haberi nullus posset, nisi liberas civitates ei in servitutem traderetis; esset deliberatio anceps: ne aut Regem amicum inhonoratum dimitteretis, aut decederetis instituto vestro, & gloriam Philippi bello partam nunc servitute tot civitatum deformaretis. Sed ab hac necessitate aut gratiæ in amicum minuendæ, aut gloriæ vestræ, egregiè vos fortuna vindicat. Est enim Deum benignitate non gloriosa magis quàm dives victoria vestra; quæ vos faciliè isto velut ære alieno exsolvat. Nam & Lycaonia & Phrygia. utraque, & Pisidia omnis, & Chersonectus, quæque circumjacent Europæ, in vestra sunt potestate: quarum una quælibet Regi adjecta, multiplicare regnum Eumenis potest; omnes verò datæ, maximis eum Regibus æquare. Licet ergo vobis & præmiis belli ditare socios, & non decedere instituto vestro, & meminisse, quem titulum prætenderitis prius adversus Philippum, nunc adversus Antiochum, belli; quid feceritis Philippo victo; quid nunc à vobis, non magis quia fecistis, quàm quia id vos facere decet, desideretur atque expectetur.

82. Alia enim aliis & honesta & probabilis est causa armorum. Illi agrum, hi vicos, hi oppida, hi portus oramque aliquam maris ut possideant. Vos nec cupistis

hæc antequam haberetis : nec nunc , quum orbis terrarum in ditione vestra sit , cupere potestis. Pro dignitate & gloria apud omne genus humanum , quodd vestrum nomen imperiumque juxtà ac Deos immortales jampridem intuetur , pugnaſtis. Quæ parare & quærere arduum fuit , nescio an tueri difficilius sit. Gentis vetuſtiſſimæ , nobiliſſimæque vel famâ rerum geſtarum , vel omni commendatione humanitatis doctrinarumque , tuendam ab ſervitio regio libertatem ſuſcepiftis. Hoc patrocinium receptæ in fidem & clientelam veſtram univerſæ perpetuum vos præſtare decet. Non quæ in ſolo modò antiquo ſunt , Græcæ magis urbes ſunt , quàm coloniæ earum , illinc quondam profectæ in Aſiam. Nec terra mutata mutavit genus aut mores : certare pio certamine cujuſlibet bonæ artis ac virtutis auſum cum parentibus quæque civitas , & conditoribus ſuis. Adiftis Græciæ , adiftis Aſiæ urbes plerique : niſi quodd longiùs à vobis abſumus , nullâ vincimur aliâ re. Maſſilienſes , quos , ſi natura inſita velut ingenio terræ vinci poſſet , jampridem efferafſent tot indomitæ circumfuſæ gentes , in eo honore , in ea meritò dignitate audimus apud vos eſſe , ac ſi medium umbilicum Græciæ incolerent. Non enim ſonum modò linguæ , veſtitumque & habitum , ſed ante omnia mores , & leges , & ingenium , ſincera integrumque à contagione accolarum ſervarunt.

83. Terminus eſt nunc Imperii veſtri mons Taurus : quicquid intra eum cardinem eſt ,

nihil longinquum vobis videri debet. Quò
arma vestra pervenerunt, eòdem jus hinc
profectum perveniat. Barbari, quibus pro
legibus semper dominorum imperia fuerunt,
quo gaudent, Reges habeant: Cæci suam
fortunam, vestros animos gerunt. Domesti-
cis quondam viribus etiam imperium am-
plectabantur; nunc imperium ubi est, ibi
ut sit perpetuum, optant; libertatem ves-
tris tueri armis satis habent, quoniam suis
non possunt.

84. At enim quædam civitates cum An-
tiocho senserunt. Et aliæ priùs cum Philip-
po, & cum Pyrrho Tarentini. Ne alios po-
pulos enumerem, Carthago libera cum suis
legibus est. Huic vestro exemplo quantum
debeat, videte, P. C. Inducetis in ani-
mum negare Eumenis cupiditati, quod jus-
tissimæ iræ vestræ negastis? Rhodii & in hoc
& in omnibus bellis, quæ in illa ora ges-
sistis, quàm fortè fidelique operâ vos adju-
verimus, vestro iudicio relinquimus: nunc
in pace id consilium afferimus, quod si
comprobaritis, magnificentius vos victoriâ
usos esse, quàm vicisse, omnes existimaturi
sint.



ORATIO

C N. MANLI

AD MILITES.

Gallos in Asiam transgressos bello persequi, quod Antiochum auxiliis juvissent, Cn. Manlius in animum induxerat. Cum igitur ad eorum fines pervenisset, quia cum hoste tam terribili omnibus regionis ejus bellum gerendum erat, adhortandos milites ratus, hujusmodi orationem habuit.

85. **N**on me præterit, milites, omnium, quæ Asiam colunt, gentium Gallos famâ belli præstare. Inter mitissimum genus hominum, ferox natio pervagata bello propè orbem terrarum, sedem cepit. Procerâ corpora, promissæ & rutilatæ comæ, vasta scuta, prælongi gladii: ad hoc cantus inchoantium prælium, & ululatus, & tripudia, & quatientium scuta in patrium quemdam morem horrendus armorum crepitus: omnia de industria composita ad terrorem. Sed hæc, quibus insolita atque infueta sunt, Græci & Phryges & Cares timeant: Romanis Gallici tumultus assuetis, etiam vanitates notæ sunt.

86. Semel primo congressu ad Alliam olim fuderunt majores nostros: ex eo tempore ducentos jam annos pecorum in mo-

dum consternatos cædunt , fugantque : & plures propè de Gallis triumphî , quàm de toto orbe terrarum acti sunt. Jam usu cognitum est , si primum impetum , quem fervido ingenio & cæcâ irâ effundunt , sustinueris , fluunt sudore & lassitudine membra , labant arma : mollia corpora , molles ubi ira confedit animos , sol , pulvis , sitis , ut ferrum non admoveas , prosternunt. Non legionibus legiones eorum solùm experti sumus , sed vir unus cum viro congrediendo. T. Manlius , M. Valerius , quantum Gallicam rabiem vinceret Romana virtus , docuerunt. Jam M. Manlius unus agmine scandentes in Capitolium Gallos detrussit. Et illis majoribus nostris cum haud dubiis Gallis in terra sua genitis res erat. Hi jam degeneres sunt ; misti , & Gallogræci verè , quod appellantur : sicut in frugibus pecudibusque , non tantùm semina ad servandam indolem valent , quantum terræ proprietās cœlique , sub quo aluntur , mutat. Macedones , qui Alexandriam in Ægypto , qui Seleuciam ac Babyloniam , quique alias sparsas per orbem terrarum colonias habent , in Syros , Parthos , Ægyptios degenerarunt. Massilia inter Gallos sita , traxit aliquantùm ab accolis animorum. Tarentinis quid ex Spartana dura illa & hõrrida disciplina mansit ? Generosius in sua quicquid sede gignitur : insitum alienæ terræ , in id quo alitur , naturâ vertente se , degenerat. Phrygas igitur Gallicis oneratos armis , sicut in acie Antiochi cecidistis , victos victores cædetis. Magis id vereor , ne

parum inde gloriæ , quàm ne nimiùm bellũ sit. Attalus eos Rex sæpe fudit , fugavitque.

88. Nolite existimare , belluās tantũ recẽs captas feritatẽ illam silvestrem primò servare , deinde , quum diu manibus humanis alantur , mitescere : in hominum feritate mulcenda non eandem naturam esse. Eosdemne hos creditis esse , qui patres eorum avique fuerunt ? Extorres inopiã agrorum profecti domo per asperrimam Illyrici oram ; Pœoniam inde & Thraciam , pugnando cum ferocissimis gentibus , emensi , has terras ceperunt. Duratos eos tot malis exasperatosque accepit terra , quæ copiã rerum omnium saginaret. Uberrimo agro , mitissimo cœlo , clementibus accolarum ingeniis , omnis illa , cum qua venerant , mansuefacta est feritas. Vobis , mehercule , Martis viris , cavenda ac fugienda quamprimum amœnitas est Asiæ. Tantũ hæ peregrinæ voluptates ad extinguendum vigorem animorum possunt : tantũ contagio disciplinæ morisque accolarum valet. Hoc tamen feliciter evenit , quòd sicut vim adversus vos nequaquam , ita famam apud Græcos parem illi antiquæ obtinent , cum qua venerunt. Belli gloriã victores eandem inter socios habebitis , quàm si servantes antiquum specimen animorum Gallos vicissetis.



O R A T I O

PHILIPPI

MACEDONUM REGIS,

Cum federet Judex inter duos filios.

Philippo Macedonum Regi duo filii fuere : Perseus alter ex pellice susceptus , sed ordine nascendi prior , alter Demetrius , ex legitima uxore. Hic obses olim ac pignus pacis missus Romam , gratus fuit Romanis , ac semper deinde Romanæ amicitiae cultor. Sed eo nomine suspectus inuisusque patri erat , bellum instaurare cupienti : multò adhuc inuisior fratri , qui eum ut gravem amulum metuebat. Venerat tempus exercitus lustrandi. Sacro peracto , exercitus de more decurrit , ac divisæ bifariam duæ acies concurrere ad simulacrum pugnae. Regii juvenes duces ei ludicro certamini dati. Infestissimis animis pugnatum. Pars ea , quæ sub Demetrio erat , longè superior fuit. Convivium eo die sodalium , qui simul decurrerant , uterque separatim habuit ; cum vocatus ad cœnam à Demetrio Perseus negasset. A victoribus inter epularum hilaritatem jocosa dicta in adversarios cum jactarentur , ad has excipiendas voces speculator à Perseo missus , à juvenibus fortè egressis iriclinio

malè mulſatur. Hujus rei ignarus Demetrius , hortatur convivæ ut comiſſatum ad fratrem eant. Igitur illi qui ſpeculatorem pulſaverant , ferrum veſte abdiderunt , quo ſe tutari , ſi qua vis fieret , poſſent. Præcurrit ſtatim index ad Perſea , qui ferro ſuccinctos cum Demetrio venire nuntiet. Perſeus infamandæ rei gratiâ januam obſerari jubet. Poſterâ die , accuſat Demetrium apud patrem , tanquam cum armatis domum ad ſe interficiendum veniſſet. Philippus , arceſſito ſtatim Demetrio , cùm conſediſſet inter duos filios , in hunc modum locutus fertur.

92. **S**Edeo miſerrimus pater Judex inter duos filios , accuſatorem parricidii , & reum ; aut conſecti , aut admiſſi criminis labem apud meos inventurus. Jampridem quidem hanc procellam imminentem timebam , quum vultus inter vos minimè fraternos cernerem , quum voces quædam exaudirem. Sed interdum ſpes animum ſubibat , deſlagrare iras veſtras , purgari ſuſpiciones poſſe : etiam hoſtes armis politiſ ſœdus icifſe , & privatas multorum ſimulantes finitas : ſubituram vobis aliquando germanitatis memoriam , puerilis quondam ſimplicitatis conſuetudiniſque inter vos , meorum denique præceptorum : quæ vercor , ne vana ſurdis auribus cecinerim. Quoties ego , audientibus vobis , deteſtatus exempla diſcordiarum fraternarum , horrendos eventus eorum retuli , quibus ſe ſtirpemque ſuam , domos , regna , funditus evertiſſent ! Meliora quo-

que exempla parte alterâ posui ; sociabilem consortionem inter binos Lacedæmoniorum Reges , salutarem per multa sæcula ipsis patriæque : eandem civitatem , posteaquam mos sibi cuique rapiendi tyrannidem exortus sit , everfam. Jam hos Eumenem Atalumque fratres , à quàm exiguis rebus , propè ut punderet regi nominis , mihi , Antiocho , & cuilibet Regum hujus ætatis , nullâ re magis , quàm fraternâ unanimitate regnum æquasse. Ne Romanis quidem exemplis abstinui , quæ aut visa aut audita habebam : T. & L. Quinctiorum , qui bellum mecum gesserunt ; P. & L. Scipionum , qui Antiochum devicerunt ; patris patruique eorum , quorum perpetuam vitæ concordiam mors quoque miscuit. Neque vos illorum scelus , similisque sceleri eventus deterrire à vecordi discordia potuit : neque horum bona mens , bona fortuna , ad sanitatem flectere. Vivo & spirante me hæreditatem meam ambo & spe & cupiditate improbâ crevistis. Eò usque me vivere vultis , donec alterius vestrûm superstes haud ambiguum Regem alterum meâ morte faciam. Nec fratrem , nec patrem potestis pati. Nihil cari , nihil sancti est : in omnium vicem regni unius insatiabilis amor successit. Agite ! conscelerate aures paternas : decernite criminibus , mox ferro decreturi : dicite palàm quicquid aut veri potestis , aut comminisci libet. Referatæ aures sunt , quæ posthac secretis alterius ab altero criminibus claudentur.

O R A T I O

PERSEI ACCUSATORIS

IN DEMETRIUM FRATREM.

95. **A** Perienda nimirum nocte janua fuit, & armati commissatores accipiendi, præbendumque ferro jugulum, quando non creditur nisi perpetratum facinus; & eadem petitus insidiis audio, quæ latro atque insidiator. Non nequicquam isti unum Demetrium filium te habere, me subditum & pellice genitum appellant. Nam si gradum, si caritatem filii apud te haberem, non in me querentem deprehensas insidias, sed in eum, qui fecisset, sævires: nec adeo tibi vilis vita esset nostra, ut nec præterito periculo meo movereris, neque futuro, si insidiantibus sit impunè.

96. Itaque si mori tacitum oportet, taceamus, precati tantum Deos, ut à me cœptum scelus in me finem habeat, nec per meum latus tu petaris. Sin autem, quod circumventis in solitudine natura ipsa subjicit, ut hominum quos nunquam viderint, fidem tamen implorent, mihi quoque ferrum in me strictum cernenti, vocem mittere liceat: per, te, patrium nomen, quod utri nostrum sanctius sit, jampridem sentis, ita me audias, precor, tanquam si voce & comploratione nocturnâ exercitûs

mihi quiritanti intervenisses , Demetrium cum armatis nocte intempestâ in vestibulo meo deprehendisses. Quod tum vociferarer in re præsentî pavidus , hoc nunc postero die queror. Frater , non commissantium in vicem jamdiu vivimus inter nos. Regnare utique vis : huic spei tuæ obstat ætas mea , obstat gentium jus , obstat vetustus Macedoniæ mos , obstat verò etiam patris judicium. Huc transcendere , nisi per meum sanguinem , non potes. Omnia moliris & tentas. Adhuc seu cura mea , seu fortuna , resistit parricidio tuo. Hesternâ die in lustratione , & decursu , & simulacro ludicræ pugnæ , funestum propè prælium fecisti : nec me aliud à morte vindicavit , quàm quòd me ac meos vinci passus sum. Ab hostili prælio , tanquam fraterno lusu , pertrahere me ad cœnam voluisti. Credis me , pater , inter inermes convivas cœnaturum fuisse , ad quem armati commissatum venerunt ? Credis nihil à gladiis nocte periculi fuisse , quem sudibus , te inspectante , propè occiderunt ?

97. Quid hœc noctis , quid inimicus ad iratum , quid cum ferro succinctis juvenibus venis ? Convivam me tibi committere ausus non sum : commissatorem te cum armatis venientem recipiam ? Si aperta janua fuisset , funus meum parares hœc tempore , pater , quo querentem audis.

98. Nihil ego , tanquam accusator criminose , nec dubia argumentis colligendo , ago. Quid enim ? Negat se cum multitudine venisse ad januam meam ? an ferro succinc-

tos secum fuille ? Quos nominavero , ar-
cesse. Possunt quidem omnia audere , qui
hoc ausi sunt : non tamen audebunt negare.
Si deprehenso intra limen meum cum ferro
ad te deducerem , pro manifesto haberes ; fa-
tentes pro deprehenso habe.

98. Execrare nunc cupiditatem regni , &
furias fraternas concita. Sed ne sint cæcæ ,
pater , execrationes tuæ : discerne & dispice
insidiatorem , & petitem insidiis : noxium
huic esse caput. Qui occisurus fratrem fuit ,
habeat etiam iratos paternos Deos : qui pe-
riturus fraterno scelere fuit , perfugium in
patris misericordia & justitia habeat. Quò
enim aliò confugiam ? cui non solenne lus-
trale exercitûs tui , non decursus militum ,
non domus , non epulæ , non nox ad quie-
tem data naturæ beneficio mortalibus , tuta
est. Si iero ad fratrem invitatus , morien-
dum est : si recepero intra januam comissa-
tum fratrem , moriendum est : nec eundo ,
nec manendo insidias evito. Quò me con-
feram ? Nihil præter Deos , pater , & te
colui : non Romanos habeo , ad quos con-
fugiam : perisse expetunt , quia tuis injuriis
doleo , quia tibi ademtas tot urbes , tot
gentes , modò Thraciæ maritimam oram ,
indignor. Nec me , nec te incolumi , Mace-
doniam futuram suam sperant. Si me scelus
fratris , te senectus absumserit , aut ne ea
quidem exspectata fuerit ; Regem regnum-
que Macedoniæ sua futura sciunt. Si quid
extra Macedoniam tibi Romani reliquissent ,
mihi quoque id relictum crederem recep-
taculum.

100. At in Macedonibus satis præsidii est. Vidisti hesterno die impetum in me militum. Quid illis defuit, nisi ferrum? Quod illis defuit interdum, convivæ fratris noctu assumerunt. Quid de magna parte Principum loquar, qui in Romanis spem omnem dignitatis & fortunæ posuerunt; & in eo, qui omnia apud Romanos potest? Neque Hercule istum mihi tantum fratri majori, sed propè est, ut tibi quoque ipsi Regi & patri præferant. Iste enim est, cujus beneficio pœnam tibi Senatus remisit; qui nunc te ab armis Romanis protegit; qui tuam senectutem obligatam & obnoxiam adolescentiæ suæ esse æquum censeret. Pro isto Romani stant, pro isto omnes urbes tuo imperio liberatæ, pro isto Macedones, qui pace Romanâ gaudent: mihi præter te, pater, quid usquam aut spei aut præsidii est?

101. Quò spectare illas litteras ad te nunc missas T. Quintii credis, quibus bene te consuluisse rebus tuis ait, quòd Demetrium Romam miseris, & hortatur, ut iterum & cum pluribus Legatis, & primoribus quoque Macedonum remittas eum? T. Quintius nunc est auctor omnium rerum isti, & magister. Eum sibi, te abdicato patre, in locum tuum substituit: illic antè omnia clandestina concocta sunt consilia. Quærantur adjutores consiliis, quum te plures, & Principes Macedonum cum isto mittere jubet. Qui hinc integri & sinceri Romam eunt, Philippum Regem se habere credentes, imbuti illinc & infecti Roma-

nis delinimentis redeunt. Demetrius iis unus omnia est : cum jam Regem vivo patre appellant.

101. Hæc si indignor , audiendum est statim , non ab aliis solùm , sed etiam à te ; pater , cupiditatis regni crimen. Ego verò , si in medio ponitur , non agnosco. Quem enim suo loco moveo , ut ipse in ejus locum succedam ? Unus ante me pater est : & ut diu sit , Deos rogo. Superstes (& ita sim , si merebor , ut ipse me esse velit) hæreditatem regni , si pater tradet , accipiam. Cupit regnum , & quidem sceleratè cupit , qui transcendere festinat ordinem ætatis , naturæ , moris Macedonum , juris gentium. “ Obstat frater major , ad „ quem jure , voluntate etiam patris regnum pertinet. Tollatur : non primus regnum fraternâ cæde petiero. Pater senex , „ & filio solus orbatûs , de se magis timebit , quàm ut filii necem ulciscatur. Romanæ lætabuntur , probabunt , defendent „ factum. „ Hæ spes incertæ , pater , sed non inanes sunt. Ita enim res se habet : periculum vitæ propellere à me potes , puniendo eos , qui ad me interficiendum ferrum sumserunt : si facinori eorum successerit , mortem meam idem qui persequi non poteris.



O R A T I O

D E M E T R I I

S E S E P U R G A N T I S.

Diu illacrimans & dolore percitus Demetrius obmutuit. A patre jussus respondere, his verbis fratris accusationem refutavit.

103. **O**Mnia, quæ reorum antea fuerant auxilia, pater, præoccupavit accusator. Simulatis lacrimis in alterius perniciem, veras meas lacrimas suspectas tibi fecit. Quim ipse, ex quo ab Roma redii, per occulta cum suis colloquia dies noctesque insidiatur, ultrò mihi non insidiatore modò, sed latronis manifesti & percussoris speciem induit. Periculo suo te exterreret, ut innoxio fratri per eundem tematurret perniciem. Perfugium sibi nusquam gentium esse ait, ut ego ne apud te quidem quicquam spei reliquæ habeam. Circumventum, solum, inopem, invidiâ gratiæ externæ, quæ obest potius, quàm prodest, onerat. Jam illud quàm accusatoriè, quòd noctis hujus crimen miscuit cum cætera infectatione vitæ meæ? ut & hoc, quòd jam quale sit, scies, suspectum alio vitæ nostræ tenore faceret: & illam vanam criminationem spei, voluntatis, consiliorum meorum, nocturno hòc ficto & composito

argumento fulciret. Simul & illud quæsit, ut repentina & minimè præparata accusatio videretur : quippe ex noctis hujus metu & tumultu repentino exorta.

105. Oportuit autem, Perseu, si proditor ego patris regnique eram, si cum Romanis, si cum aliis inimicis patris inieram consilia, non expectatam fabulam noctis hujus esse, sed proditiōis meæ antè me accusatum : si illa separata ab hac vana accusatio erat, invidiamque tuam adversus me magis, quàm crimen meum indicatura, hodie quoque eam aut prætermitti, aut in aliud tempus differri : ut perspiceretur, utrùm ego tibi, an tu mihi, novo quidem & singulari genere odii, insidias fecisses. Ego tamen, quantum in hac subita perturbatiōe poterō, separabo ea quæ tu confudisti : & noctis hujus insidias aut tuas, aut meas detegam.

105. Occidendi suū consilium me inisse videri vult : ut scilicet, majore fratre sublato, cujus jure gentium, more Macedonum, tuo etiam, ut ait, judicio regnum est futurum ; ego minor in ejus quem occidissem, succederem locum. Quid ergo illa sibi vult pars altera orationis, quā Romanos à me cultos ait, atque eorum fiduciā in spem regni me venisse ? Nam si & in Romanis tantum momenti esse credebam, ut quem vellent, imponerent Macedoniæ Regem, & meæ tantum apud eos gratiæ confidebam ; quid opus parricidio fuit ? An ut cruentum fraternā eade diadema gererem ? ut illis ipsis, apud

quos aut verâ , aut certè simulatâ probitate partam gratiam habeo , si quam fortè habeo , execrabilis & invisus essem. Nisi T. Quintium credis , cujus virtute & consiliis me nunc arguis regi , quum & ipse tali pietate vivat cum fratre , mihi fraternæ cædis fuisse auctorem.

106. Idem non Romanorum solùm gratiam , sed Macedonum judicia , ac penè omnium Deorum hominumque consensum collegit , per quæ omnia se mihi parem in certamine non futurum crediderit : idem tanquam in aliis omnibus rebus inferior essem , ad sceleris spem ultimam confugisse me insinuat. Vis hanc formulam cognitionis esse , ut uter timuerit , ne alter dignior videretur regno , is consilium opprimendi fratris cepisse judicetur ?

107. Exequamur tamen quocunque modo conficti ordinem criminis. Pluribus modis se petitum criminatus est , & omnes insidiarum vias in unum diem contulit. Volui interdum eum post lustrationem , quum concurrimus , & quidem , si Diis placet , lustrationum die occidere : volui , quum ad coenam invitati , veneno scilicet tollere : volui , quum commissatum gladiis accincti me sequuti sunt , ferro interficere. Tempora quidem qualia sint ad parricidium electa , vides , lusûs , convivii , comissationis. Quis dies ? qualis ? Quo lustratus exercitus , quo inter divisam victimam prælatis omnium , qui unquam fuere , Macedonia Regum armis regiis , duo soli tua regentes latera , pater , prævecti sumus , & sequutum est

Macedonum agmen. Hôc ego, etiam si quid antè admissem piaculo dignum, lustratus & expiatus sacro, tum cùm maximè in hostiam itineri nostro circumdatam intuens; parricidium, venena, gladios in comissionem præparatos, volutabam in animo: ut quibus aliis deinde sacris contaminatam omni scelere mentem expiarem?

108. Sed cæcus criminandi cupiditate animus, cùm omnia suspecta efficere vult, aliud alio confundit. Nam si veneno inter cœnam tollere volui, quid minùs aptum fuit, quàm pertinaci certamine & concursu iratum te efficere, ut meritò, sicut fecisti, invitatus ad cœnam abnueres? Quum autem iratus negasses, utrùm ut placarem te danda opera fuit, ut aliam quærerem occasionem, quoniam semel venenum paraveram: an ab illo consilio velut transiliendum ad aliud fuit, ut ferro te, & quidem eo die, per speciem comissionis occiderem? Quo deinde modo, si te metu mortis credebam cœnam evitasse meam, non ab eodem metu comissionem quoque evitaturum existimabam?

109. Non est res quâ erubescam, pater, si die festo inter æquales largiore vino sum usus. Tu quoque velim inquiras, quâ lætitiâ, quo lusu apud me celebratum hesternum convivium sit: illo etiam (pravo forsitan) gaudio provehente, quòd in juvenili armorum certamine pars nostra non inferior fuerat. Miseria hæc & metus crapulam facilè excusserunt: quæ si non intervenissent, insidiatores nos sopiti jacere-

mus. Si domum tuam expugnaturus, captâ domo dominum interfecturus eram, non temperassem vino in unum diem? non milites abstinuissem meos? Et ne ego me solus nimîâ simplicitate tuear, ipse quoque minimè malus ac suspicax frater, nihil aliud scio, inquit, nihil arguo, nisi quòd cum ferro commissatum venerunt. Si quæram, unde id ipsum scieris, necesse erit te fieri, aut speculatorum tuorum plenam domum fuisse meam, aut illos ita apertè sumsisse ferrum, ut omnes viderent.

110. Et ne quid ipse aut priùs inquisisse, aut nunc criminose argumentari videretur, te quærere ex iis, quos nominasset, jubebat, an ferrum habuissent? ut tanquam in re dubia, quum id quæsissem, quod ipsi fatentur, pro convictis haberentur. Quin tu illud quæri jubes, num tuî occidendi causâ ferrum sumserint? num me auctore & sciente? Hoc enim videri vis, non illud quod fatentur & palàm est, & sui se tuendi causâ sumsisse dicunt. Rectè an perperam fecerint, ipsi sui facti rationem reddent. Meam causam, quæ nihil eo facto contingitur, ne miscueris: aut explicâ, utrùm apertè an clam te aggressuri fuerimus. Si apertè, cur non omnes ferrum habuimus? cur nemo præter eos qui tuum speculatorem pulsarunt? Si clam, quis ordo consilii fuit? Convivio soluto, quum commissator ego discessissem, quatuor substitissent, ut sopitum te aggredierentur? Quomodo fefellissent & alieni, & mei, & maximè suspecti, quia paulò antè in rixâ

fuerant ? Quomodo autem trucidato te ipsi evasuri fuerint ? Quatuor gladiis domus tua capi & expugnari potuit ? Quin tu , omiſſâ iſtâ nocturnâ fabulâ , ad id quod doles , quod invidiam urit , reverteris ? „ Cur ulquam regni tui mentio fit , De- „ metri ? Cur dignior patris fortunæ ſuc- „ ceſſor quibuſdam videris , quàm ego ? „ Cur ſpem meam , quæ , ſi tu non eſſes , „ certa erat , dubiam & ſollicitam facis ? „ Hæc ſentit Perſeus , etſi non dicit : hæc iſtum inimicum , hæc accuſatorem faciunt : hæc domum , hæc regnum tuum crimini- bus & ſuſpicionibus replent. Ego autem , pater , quemadmodum nec nunc ſperare regnum , nec ambigere unquam de eo forſitan debeam , quia minor ſum , quia tu me majori cedere vis ; ſic illud nec debui facere , nec debeo , ut indignus tibi , pater , indignus omnibus videar. Id enim vitiis meis , non cedendo , cui jus faſque eſt , non modetiâ conſequar.

112. Romanos objicis mihi : & ea quæ gloriæ eſſe debent , in crimen vertis. Ego nec obſes Romanis ut traderer , nec ut Le- gatus mitterer Romam , petii : à te miſ- ſus , ire non recuſavi : utroque tempore ita me geſſi , ne tibi pudori , ne regno tuo , ne genti Macedonum eſſem. Itaque mihi cūm Romanis amicitix cauſa tu fuiſti , pater : quoad tecum illis pax manebit , mecum quoque gratia erit ; ſi bellum eſſe cœperit , qui obſes , qui Legatus pro pa- tre non inutilis fui , idem hostis illis acer- rimus ero. Nec hodie ut proſit mihi gratia
Romanorum

Romanorum, postulo: ne obsit, tantum deprecor. Nec in bello cœpit, nec ad bellum reservatur. Pacis pignus fui: ad pacem retinendam Legatus missus sum. Neutra res mihi nec gloriæ, nec crimini sit. Ego si quid impiè in te, pater, si quid sceleratè in fratrem admisi, nullam deprecor pœnam: si innocens sum, ne invidiâ conflagrem, quum crimine non possim, deprecor.

113. Non hodie me primùm frater accusat; sed hodie primùm apertè: nullo meo in se merito. Si mihi pater succenseret, te majorem fratrem pro minore deprecari oportebat, te adolescentiæ, te errori veniam impetrare. In eo ubi præsidium esse oportebat, ibi exitium est. E convivio & comissionibus propè semisomnus raptus sum ad causam parricidii dicendam: sine advocatis, sine patronis, ipse pro me dicere cogor. Si pro alio dicendum esset, tempus ad meditando & componendam orationem sumsissem; quum quid aliud quàm ingenii famâ periclitarer? Ignarus quid arcessitus essem, te iratum & jubentem dicere causam, fratrem accusantem audiui. Ille diu antè præparatâ, meditatâ in me oratione est usus: ego id tantum temporis, quo accusatus sum, ad cognoscendum quid ageretur, habui. Utrùm momento illo horæ accusatorem audirem? an defensionem meditarer? Attonitus repente atque inopinato malo, vix quid objiceretur, intelligere potui: nedum satis sciam quo modo me tuear. Quid mihi spei esset.

Pars II.

D

nisi patrem Judicem haberem? apud quem etiam si caritate à fratre majore vincor, misericordiâ certè reus vinci non debeo. Ego enim ut me mihi tibiue serves, precor: ille ut me in securitatem suam occidas, postulat. Quid eum, quum regnum ei tradideris, facturum credis in me esse, qui jam nunc sanguine meo sibi indulgeri æquum censet?



ORATIONES

E X

CORNELIO TACITO

COLLECTÆ.

ORATIO

GERMANICI CÆSARIS

AD SEDITIOSOS MILITES.

Germanicæ legiones turbatæ erant. Præerat Germanicus Cæsar, patre Druso genitus, à Tiberio patruo adoptatus. Is militum animos placaverat multis commodis eos augendo. Sed cùm Legati ab Senatu venissent, pavidos & conscientiâ vecordes intrat metus, missos esse, ut irrita facerent, quæ per seditionem expresserant. Rursus itaque turbantur legiones. Tum verò Germanicus uxorem ac filium parvulum procul à furentibus summove statuit, & in locum tutum mittere. Tergit ea res militum animos. Germanicum adeunt, orant ut mutaret consilium. Isque ut erat recens dolore & irâ, apud circumfusus ita cepit.

116. **N**ON mihi uxor, aut filius, patre
& Repub. cariores sunt. Sed il-
lum quidem sua majestas, Imperium Roma-
D ij

num cæteri exercitus defendent : conjugem & liberos meos , quos pro gloria vestra libens ad exitium offerrem , nunc procul à furētibz summoveo , ut quidquid istuc sceleris imminet , meo tantum sanguine pietur ; neve occisus Augusti pronepos , interfecta Tiberii nurus , nocentiores vos faciat. Quid enim per hos dies inausum , intemertatumve vobis ? Quod nomen huic cœtui dabo ? Militesne appellem ? qui filium Imperatoris vestri vallo & armis circumfeditis : an cives ? quibus tam projecta Senatûs auctoritas. Hostium quoque jus , & sacra legationis , & fas gentium rupistis. Divus Julius seditionem exercitûs verbo uno compescuit , Quirites vocando , qui sacramentum ejus detrectabant. Divus Augustus vultu & adspectu Actiacas legiones exteruit. Nos ut nondum eosdem , ita ex illis orfos , si Hispaniæ Syriæve miles aspernaretur , tamen mirum & indignum erat. Primane & vicesima legiones , illa signis à Tiberio acceptis , tu tot præliorum socia , tot præmiis aucta , egregiam duci vestro gratiam refertis ? Hunc ego nuncium patri , læta omnia aliis è provinciis audienti , feram ? ipsius tirones , ipsius veteranos , non missione ; non pecuniâ fatiatos : hîc tantum interfici Centuriones , ejici Tribunos , includi Legatos : infecta sanguine castra , flumina : meque precariam animam inter insensos trahere ? Cur enim primo concionis die ferrum illud quod pectori meo infigere parabam , detraxistis ? O improvidi amici ! melius & amantiùs ille qui gladium offerebat. Cecidissem certè non-

dum tot flagitiorum exercitui meo conscius :
 legissetis ducem , qui meam quidem mortem
 impunitam sineret , Vari tamen & trium
 legionum ulcisceretur. Neque enim Dñi si-
 nant ut Belgarum , quanquam offerentium ;
 decus istud & claritudo sit , subvenisse Ro-
 mano nomini , compressisse Germaniæ po-
 pulos. Tua , dive Auguste , cœlo recepta
 mens ; tua , pater Druse , imago , tuâ memoria ,
 hisdem istis cum militibus , quos jam pudor
 & gloria intrat , eluant hanc maculam , iras-
 que civiles in exitium hostibus vertant. Vos
 quoque quorum alia nunc ora , alia pectora
 contueor ; si Legatos Senatui , obsequium Im-
 peratori , si mihi conjugem ac filium red-
 ditis , discedite à contactu ac dividite tur-
 bidos. Id stabile ad pœnitentiam , id fidei
 vinculum erit.



O R A T I O

M. HORTALI,

Subsidium rei suæ familiari poscentis.

M. Hortalus, nepos Oratoris Hortensii, cum gravi inopiâ premeretur, inlectus Augusti liberalitate fuerat ducere uxorem, suscipere liberos. Cum igitur quatuor filios sustulisset, gravisque esset in angustis rebus hæc tam numerosa soboles, adductis iis ad curiæ limen, cum in Palatio Senatus haberetur, ad hunc modum cœpit.

120. **P**ATRES Conscripti, hos quorum numerum & pueritiam videtis, non sponte sustuli, sed quia Princeps monebat: simul majores mei meruerant, ut posteros haberent. Nam ego, qui non pecuniam, non studia Populi, neque eloquentiam, gentile domûs nostræ bonum, varietate temporum, accipere vel parare potuissem, satis habebam, si tenues res meæ nec mihi pudori, nec cuiquam oneri forent. Jussus ab Imperatore, uxorem duxi. En stirps & progenies tot Consulum, tot Dictatorum. Nec ad invidiam ista, sed conciliandæ misericordiæ refero. Adsequentur, florente te, Cæsar, quos dederis honores: interim Q. Hortensii pronepotes, divi Augusti alumnos, ab inopia defende.

O R A T I O
T I B E R I I C Æ S A R I S
H O R T A L O R E S P O N D E N T I S.

121. **S**I quantùm pauperum est, venire huc, & liberis suis petere pecunias cœperint; singuli nunquam exsatiabuntur, Respublica deficiet. Nec sanè ideo à maioribus concessum est, egredi aliquando relationem, & quod in commune conducatur, loco sententiæ proferre, ut privata negotia, res familiares nostras hîc augeamus; cum invidia Senatûs & Principum, sive indulserint largitionem, sive abnuerint. Non enim preces sunt istuc, sed efflagitatio intempestiva quidem & improvisa, cùm aliis de rebus convenerint Patres, consurgere, & numero atque ætate liberûm suorum urgere modestiam Senatûs, eandem vim in me transmittere, ac velut perfringere ærarium: quod si ambitione exhaustimus, per scelera supplendum erit. Dedit tibi, Hortale, divus Augustus pecuniam, sed non compellatus, nec eâ lege ut semper daretur. Languescet alioqui industria, intendetur fœcordia, si nullus ex se metus aut spes: & securi omnes aliena subsidia expectabunt: sibi ignavi, nobis graves.

O R A T I O
GERMANICI MORIENTIS
AD AMICOS.

Germanicus jamjam moriturus, cum venenum sibi à Pifone Suriae Præsidi Plancinaque ejus uxore datum esse pro certo haberet, amicos orat, ne mortem suam inultam patiantur.

123. **S**I fato concederem, justus mihi dolor etiam adversus Deos esset, quod me parentibus, liberis, patriæ, intra juventam præmaturo exitu raperent. Nunc scelere Pisonis & Plancinæ interceptus, ultimas preces pectoribus vestris relinquo: referatis patri ac fratri, quibus acerbitatibus dilaceratus, quibus insidiis circumventus, miserrimam vitam pessimâ morte finierim. Si quos spes meæ, si quos propinquus sanguis, etiam quos invidia erga viventem movebat; inlacrimabunt, quondam florentem, & tot bellorum superstitem, muliebri fraude cecidisse. Erit vobis locus querendi apud Senatum, invocandi leges. Non hoc præcipuum amicorum munus est, prosequi defunctum ignavo questu; sed quæ voluerit, meminisse; quæ mandaverit, exsequi. Flebunt Germanicum etiam ignoti: vindicabitis vos, si me potius, quàm fortunam meam

fovebatis. Ostendite populo Romano divi Augusti neprem, eandemque conjugem meam: numerate sex liberos. Misericordia cum accusantibus erit: fingentibusque scelestam mandata, aut non credent homines, aut non ignoscent.

O R A T I O

T I B E R I I

I N S E N A T U,

De Pisone & ipsius accusatoribus.

Piso Suriâ pulsus, ac reversus Romam, ab amicis Germanici apud Senatum accusatur. Tiberius eò intentior ad cohibendos premeandosque penitus sensus suos, quò ad eos rimandos magis arrecta civitas erat, die Senatûs orationem habuit meditato temperamento.

125. **P**atris sui Legatum atque amicum Pisonem fuisse, adiutoremque Germanico datum à se, auctore Senatu, rebus apud Orientem administrandis. Illic contumaciâ & certaminibus asperasset juvenem, exituque ejus lætatus esset, an scelere extinxisset; integris animis dijudicandum. Nam si Legatos, officii terminos, obsequium erga Imperatorem exuit, ejusdemque morte, & luctu meo lætatus est; odero, seponam-

D v

que à domo mea , & privatas inimicitias , non Principis ulciscar. Sin facinus , in cujuscunque mortalium nece vindicandum , detegitur , vos verò & liberos Germanici , & nos parentes justis solatiis adficite. Simulque illud reputate , turbidè & seditiosè tractaverit exercitus Piso ; quæsitæ sint per ambitionem studia militum , armis repetita provincia ; an falsa hæc in majus vulgaverint accusatores. Quorum ego nimis studiis jure succenseo. Nam quò pertinuit nudare corpus , & contrectandum vulgi oculis permittere , differrique etiam per externos , tanquam veneno interceptus esset , si incerta adhuc ista , & scrutanda sunt ? Desleo equidem filium meum , semperque dolebo ; sed neque reum prohibeo , quominus cuncta proferat , quibus innocentia ejus sublevari , aut si qua fuit iniquitas Germanici , coargui possit : vosque oro , ne , quia dolori meo causa connexa est , objecta crimina pro adprobatis accipiatis. Si quos propinquus sanguis aut fides sua patronos dedit , quantum quisque eloquentiâ & curâ valet , juvate periclitantem. Ad eundem laborem , eandem constantiam accusatores hortor. Id solùm Germanico super leges præstiterimus , quod in curia potius quam in foro , apud Senatum , quàm apud Judices , de morte ejus anquiritur. Cætera pari modestiâ tractentur. Nemo Drusi lacrymas , nemo moestitiam meam spectet , nec si qua in nos adversa finguntur.

L I T T E R Æ
T I B E R I I

A D S E N A T U M ,

De luxu , quem coërceri jam posse
negat.

Mentio illata ab Ædilibus fuerat de coërcendo luxu , qui immensum proruperat. Consulti Patres integrum id negotium ad Principem , qui tum in Campania erat , distulerant. Tiberius , re diu multumque perpensâ , litteras ad Senatum composuit , quarum sententia in hunc modum fuit.

118. CÆteris forsitan in rebus , P. C. magis expediat me coram interrogari , & dicere quid è Repub. censeam : in hac relatione , subtrahi oculos meos meliùs fuit , ne denotantibus vobis ora , ac metum singulorum qui pudendi luxûs arguerentur , ipse etiam viderem eos , ac velut deprehenderem. Quod si mecum antè viri strenui Ætiles consilium habuissent ; nescio an suasurus fuerim omittere potiùs prævalida & adulta vitia , quàm hoc adsequi , ut palàm fieret quibus flagitiis impares essemus. Sed illi quidem officio functi sunt , ut cæteros quoque Magistratus sua

munia implere velim : mihi autem neque honestum filere , neque proloqui expeditum , quia non *Ædilis* , aut *Prætoris* , aut *Consulis* partes sustineo ; majus aliquid & excelsius à Principe postulatur : & cùm rectè factorum sibi quisque gratiam trahant , unius invidiâ ab omnibus peccatur. Quid enim primùm prohibere , & priscum ad morem recidere adgrediar ; villarumne infinita spatia ? familiarum numerum , & nationes ? argenti & auri pondus ? æris , tabularumque miracula ? promiscuas viris & feminis vestes , atque illa feminarum propria , quâs lapidum causâ pecuniæ nostræ ad externas aut hostilis gentes transferuntur ? Nec ignoro in conviviiis & circulis incusari ista , & modum posci : sed si quis legem sanciat , pœnas indicat ; iidem illi civitatem verti , splendidissimo cuique exitium parari , neminem criminis expertem clamitabunt. Atqui ne corporis quidem morbos veteres & diu auctos , nisi per dura & aspera coërceas : corruptus simul & corruptor , æger & flagrans animus , haud levioribus remediis restringendus est , quàm libidinibus ardescit. Tot à majoribus repertæ leges , tot quas divus Augustus tulit , illæ oblivione , hæ (quod flagitiosius est) contentu abolitæ , securiorem luxum fecere. Nam si velis quod nondum vetitum est ; timeas , ne vetere : at si prohibita impunè transcenderis ; neque metus ultra , neque pudor est. Cur ergo olim parcimonia pollebat ? quia sibi quisque moderabatur : quia unius urbis cives eramus :

ne irritamenta quidem eadem, intra Italiam dominantibus. Externis victoriis aliena, civilibus etiam nostra consumere didicimus. Quantulum istud est, de quo *Ædiles* admonent! Quàm, si cætera respicias, in levi habendum! At, *Hercule*, nemo refert, quòd Italia externæ opis indiget, quòd vita *Populi Romani* per incerta maris & tempestatum quotidie volvitur. Ac nisi provinciarum copix & dominis, & servitiis, & agris subvenerint; nostra nos scilicet nemora, nostræque villæ tuebuntur? Hanc, *P. C.* curam sustinet Princeps. Hæc omissa, funditus *Remp.* trahet: reliquis intra annum melendum est. Nos, pudor; pauperes, necessitas; divites, satias in melius mutet. Aut si quis ex Magistratibus tantum industriam ac severitatem pollicetur, ut ire obviam queat; hunc & laudo, & exonerari laborum meorum partem fateor. Sin accusare vitia volunt, dein cum gloriam ejus rei adepti sunt, simulates faciunt, ac mihi relinquunt; credite, *P. C.* me quoque non esse offensionum avidum. Quas cum graves, & plerumque iniquas, pro *Repub.* suscipiam, inanes & irritas, neque mihi aut vobis usui futuras jure deprecor.



O R A T I O

CREMUTII CORDI,

*Accusati regnante Tiberio , quòd editis
annalibus , M. Brutum & C. Cas-
sium laudâsset.*

133. **V**ERba mea , P. C. arguuntur : adeo
factorum innocens sum. Sed neque
hæc in Principem aut Principis parentem ,
quos lex majestatis amplectitur. Brutum &
Cassium laudavisse dicor : quorum res ges-
tas , cùm plurimi composuerint , nemo sine
honore memoravit. Titus-Livius eloquen-
tiæ ac fidei præclarus in primis , Cn. Pom-
peium tantis laudibus tulit , ut Pompeia-
num eum Augustus appellaret. Neque id
amicitiæ eorum offecit. Scipionem , Afra-
nium , hunc ipsum Cassium , hunc Bru-
tum , nusquam latrones & parricidas , quæ
hunc vocabula imponuntur , sæpe ut insignes
viros nominat. Asinii Pollionis scripta
egregiam eorumdem memoriam tradunt.
Messala Corvinus Imperatorem suum Cas-
sium prædicabat : & uterque opibusque
atque honoribus perviguere. Marci Cicero-
nis libro , quo Catonem cælo æquavit ,
quid aliud Dictator Cæsar , quàm rescriptâ
oratione , velut apud Judices , respondit ?
Antonii epistolæ , Bruti conciones , falsa

quidem in Augustum probra, sed multa cum acerbitate habent. Carmina Bibaculi & Catulli, referta contumeliis Cæsarum leguntur. Sed ipse divus Julius, ipse divus Augustus, & tulere ista & reliquere; haud faciliè dixerim, moderatione magis, an sapientiâ. Namque spreta exolescunt: si irascere, adgnita videntur. Non attingo Græcos, quorum non modò libertas, etiam libido impunita: aut si quis advertit, dictis dicta ultus est. Sed maximè solutum, & sine obtrektatore fuit, prodere de iis quos mors odio aut gratiæ exemisset. Num cum armatis Cassio & Bruto, ac Philippenses campos obtinentibus, belli civilis causâ, Populum per conciones incendio? An illi quidem septuagesimum ante annum peremti, quo modo imaginibus suis noscuntur, quas nec victor quidem abolevit, sic partem memoriæ apud scriptores retinent? Suum cuique decus posteritas reperdit. Nec deerunt, si damnatio ingruit, qui non modò Cassii & Bruti, sed etiam mei meminerint.



O R A T I O

T I B E R I I ,

Templum sibi in Hispania extrui ventantis.

Biennio antè Asiæ civitates decreverant templum Tiberio. Et permissum fuerat statuerè. Hòc anno cùm Hispania ulterior, missis ad Senatum Legatis, oraret, ut exemplo Asiæ delubrum Tiberio extrueret, Cæsar hujusmodi orationem habere cepit.

136. SCio, P. C. constantiam meam à splerisque desideratam, quòd Asiæ civitatibus nuper idem istud petentibus, non sim adversatus. Ergo & prioris silentii defensionem, & quid in futurum statuerim, simul aperiàm. Quum divus Augustus sibi atque urbi Romæ templum apud Pergamum sisti non prohibuisset; qui omnia facta dictaque ejus, vice legis, observem, placitum jam exemplum promtius sequutus sum, quia cultui meo veneratio Senatûs adjungebatur. Cæterum, ut semel recepisse, veniam habuerit; ita per omnes provincias effigie numinum sacrari ambitiosum, superbum: & vanescet Augusti honor, si promiscuis adulationi-

bus vulgatur. Ego me , P. C. mortalem esse , & hominum officia fungi , satisque habere , si locum principem impleam , & vos testor , & meminisse posteros volo : qui satis superque memoriæ meæ tribuent , ut majoribus meis dignum , rerum vestrarum providum , constantem in periculis , offensionum pro utilitate publica non pavidum credant. Hæc mihi in animis vestris templa , hæ pulcherrimæ effigies , & mansuræ. Nam quæ saxo struuntur , si judicium posterorum in odium vertit , pro sepulchris spernuntur. Proinde socios , cives , & Deos ipsos precor : hos , ut mihi ad finem usque vitæ , quietam & intelligentem humani divinique juris mentem dent : illos , ut quandocunque concessero , cum laude & bonis recordationibus facta atque famam nominis mei prosequantur.



O R A T I O

M. TERENTII

E Q U I T I S R O M A N I,

Ob Sejani amicitiam rei.

Patuère tandem scelesti Sejani de parando regno consilia. Ipse oppressus interiit. Secuta deinde ejus amicorum strages. Verùm eâ tempestate quâ Sejani amicitiam exteri falsò exuerant, ausus est Eques Romanus M. Terentius, ob id reus, amplecti crimen, ad hunc modum apud Senatū ordiendo.

138. **F**ortunæ quidem meæ fortasse minùs expediat adgnoscerè crimen, quàm abnuere. Sed utcunque casura res est; fatebor & fuisse me Sejano amicum, & ut essem experisse, & postquam adeptus eram, lætatum. Videram collegam patris regendis prætoriiis cohortibus; mox urbis & militiæ munia simul obeuntem. Illius propinqui & adfines honoribus augebantur. Ut quisque Sejano intimus, ita ad Cæsaris amicitiam validus: contrà quibus infensus esset, metu ac fordibus conflictabantur. Nec quemquam exemplo adsumo: cunctos qui novissimi consilii expertes fuimus, meo unius dis-

crimine defendam. Non enim Sejanum Vulfiniensem, sed Claudiae & Juliae domus partem, quas adfinitate occupaverat, tuum, Cæsar, generum, tui consulatus socium, tua officia in Republ. capeffentem colebamus. Non est nostrum æstimare, quem supra cæteros, & quibus de causis extollas. Tibi summum rerum judicium Dii dedere; nobis obsequii gloria relicta est. Spectamus porro quæ coram habentur; cui ex tæ opes, honores, quis plurimâ juvandi nocendive potentiâ: quæ Sejano fuisse, nemo negaverit. Abditos Principis sensus, & si quid occultius parat, exquirere inlicitum, anceps: nec ideo adsequare. Ne, P. C. ultimum Sejani diem, sed sexdecim annos cogitaveritis. Etiam Satrium atque Pomponium venerabamur: libertis ac janitoribus ejus notescere, pro magnifico accipiebatur. Quid ergo? Indistincta hæc defensio & promiscua dabitur? Imò justis terminis dividatur. Insidiæ in Rempublicam, consilia cædis adversum Imperatorem, puniantur: de amicitia & officiis, idem finis & te, Cæsar, & nos absolverit.



O R A T I O

S E N E C Æ

A D N E R O N E M.

Seneca cùm Neronem ad deteriores inclinare cerneret, seque variis criminationibus incessi, cedere invidiæ statuit, seque in otium penitus abdere. Igitur Cæsarem adit, atque in hunc modum alloquitur.

141. **Q**uartusdecimus annus est, Cæsar, ex quo spei tuæ admotus sum; octavus, ut imperium obtines: medio temporis, tantum honorum atque opum in me cumulasti, ut nihil felicitati meæ desit, nisi moderatio ejus. Utar magnis exemplis, nec meæ fortunæ, sed tuæ. Atavus tuus Augustus, M. Agrippæ Mytilenense secretum; C. Mæcenati, urbe in ipsa, velut peregrinum otium permisit: quorum alter bellorum socius, alter Romæ pluribus laboribus jactatus, ampla quidem, sed pro ingentibus meritis, præmia acceperant. Ego quid aliud munificentiae adhibere potui, quam studia, ut sic dixerim, in umbra educata? & quibus claritudo venit, quod juvenutæ tuæ rudimentis affuisse videor; grande hujus rei pretium. At tu gratiam immensam, innumeram pecuniam circumdedisti adeo ut plerumque intra meipsum volvam: Egone

equestri & provinciali loco ortus , proce-
ribus civitatis annumeror ? Inter Nobiles &
longa decora præferentes , novitas mea eni-
tuit ? Ubi est animus ille modicis conten-
tus ? Tales hortos instruit , & per hæc
faburbana incedit , & tantis agrorum spa-
tiis , tam lato fœnore exuberat ? Una de-
fensio occurrit , quodd muneribus tuis ob-
niti non debui. Sed uterque mensuram im-
plevimus , & tu quantum Princeps tribuere
amico posset , & ego quantum amicus à
Principe accipere. Cætera invidiam augment :
quæ quidem , ut omnia mortalia , infra
tuam magnitudinem jacet : sed mihi in-
cumbit : mihi subveniendum est. Quo mo-
do in militia aut via fessus adminiculum
orarem ; ita in hoc itinere vitæ , senex ,
& levissimis quoque curis impar , cum opes
meas ultrà sustinere non possim , præsidium
peto. Jube eas per procuratores tuos ad-
ministrari , in tuam fortunam recipi. Nec
me in paupertatem ipse detrudam , sed tra-
ditis quorum fulgore perstringor , quod
temporis hortorum aut villarum curæ se-
ponitur , in animum revocabo. Superest
tibi robur , & tot per annos nixum fastigii
regimen : possumus seniores amici , quieto
respondere. Hoc quoque in tuam gloriam
cedet , eos ad summa vexisse , qui & mo-
dica tolerarent.



RESPONSIO NERONIS

AD SENECA M.

144. **Q**Uòd meditatz orationi tuæ statim occurram, id primùm tui muneris habeo, qui me non tantùm prævifa, fed subita expedire docuisti. Avus meus Augustus Agrippæ & Mæcenati usurpare otium post labores concessit, fed in ea ipsa ætate, cujus autoritas tueretur, quicquid illud & qualecunque tribuisset. Attamen neutrum datis à se præmiis exuit. Bello & periculis meruerant: in his enim juventa Augusti versata est. Nec mihi tela & manus tuæ defuissent, in armis agenti. Sed quod præsens conditio poscebat, ratione, consilio, præceptis pueritiam, dein juventam meam fovisti. Et tu quidem erga me munera, dum vita suppetet, æterna erunt. Quæ à me habes, horti, & fœnus, & villæ casibus obnoxia sunt: ac licèt multa videantur, plerique haudquaquam artibus tuis pares, plura tenuerunt. Pudet referre libertinos, qui ditiores spectantur. Unde etiam rubori mihi est, quòd præcipuus caritate, nondum omnes fortunâ antecellis. Verùm & tibi valida ætas, rebusque & fructui rerum sufficiens; & nos prima imperii spatia in-

gredimur : nisi fortè aut te Vitellio ter
 Consuli , aut me Claudio præponis. Sed
 quantum Volusio longa parcimonia quæsi-
 vit , tantum in te mea liberalitas explere
 non potest. Quin , si qua in parte lubri-
 cum adolescentiæ nostræ declinat , revo-
 cas ; ornatumque robur , subsidio impen-
 sius regis. Non tua moderatio , si reddide-
 ris pecuniam ; nec quies , si reliqueris
 Principem ; sed mea avaritia , meæ crude-
 litatis metus in ore omnium versabitur.
 Quodd si maximè continentia tua laudetur ,
 non tamen sapienti viro decorum fuerit ,
 unde amico infamiam paret , inde gloriam
 sibi recipere.



ORATIO

PÆTI THRASEÆ,

Ne pro Prætoribus prove Consulibus
grates apud Senatum à provincia-
libus agerentur.

Claudius Timarchus Cretensis, reus agebatur cum aliis criminibus, tum quòd dicitasset in sua potestate situm, utrum Proconsulibus, qui Cretam obtinuissent, grates agerentur. Quam occasionem Patus Thrasea in bonum publicum vertens, postquam de reo censuerat, hæc addidit.

146. **U**Su probatum est, P. C. leges egregias, exempla honesta, apud bonos ex delictis aliorum gigni. Sic Oratorum licentia, Cinciam rogationem; Candidatorum ambitus, Julias leges; Magistratum avaritia, Calpurnia scita, pepererunt. Nam culpa, quàm pœna tempore prior; emendari, quàm peccare posterius est. Ergo adversus novam provincialium superbiam, dignum fide, constantiâque Romanâ capiamus consilium, quo tutelæ sociorum nihil derogeretur, nobis opinio decedat, qualis quisque habeatur, alibi quàm in civium iudicio esse. Olim quidem non modò Prætor aut Consul, sed privati etiam mittebantur,

bantur, qui provincias viferent, & quid de cujusque obsequio videretur, referrent: trepidabantque gentes de æstimatione singulorum. At nunc colimus externos & adulamur, & quomodo ad nutum alicujus grates, ita promtiùs accusatio decernitur: decernaturque, & maneat provincialibus, potentiam suam tali modo ostentandi: sed laus falsa & precibus expressa, perinde cohibeantur, quàm malitia, quàm crudelitas. Plura sæpe peccantur dum demeremur, quàm dum offendimus. Quædam imò virtutes odio sunt; severitas obstinata, invictus adversus gratiam animus. Inde initia Magistratuum nostrorum meliora ferme, & finis inclinat, dum in modum candidatorum suffragia conquirimus: quæ si arceantur, æqualiùs atque constantiùs provinciæ regentur. Nam ut metu repetundarum infracta avaritia est, ita vetitâ gratiarum actione ambitio cohibetur.



O R A T I O


CAPITONIS COSSUTIANI,

Neronem in Thraseam instigantis.

Patus Thrasea virtutibus suis iram Neronis meritus erat. Multa quippe egerat, adulandi nescius, Stoicorum more, ex quibus appareret savitiam ipsi ac libidines Principis magnopere improbari. Ob ea igitur insensum ipsi Neronis animum, insuper accendebat Capito Cossutianus, præter animum ad flagitia præcipitem, privatis etiam de causis inimicus Thrasea.

149. **U**T quondam C. Cæsarem, & M. Catonem, ita nunc te, Nero, & Thraseam avida discordiarum civitas loquitur. Et habet sectatores, vel potius satelites, qui nondum contumaciam sententiarum, sed habitum vultumque ejus sectantur, rigidi & tristes quò tibi lasciviam exprobrent. Huic uni incolumitas tua sine arte, sine honore. Prosperas Principis res spernit: etiamne luctibus & doloribus non fatiatur? Ejusdem animi est, Poppæam divam non credere, cujus, in acta divi Augusti & divi Julii non jurare. Spernit religiones, abrogat leges. Diurna Pop. Romani per provincias, per exercitus curatius eguntur, ut noscatur quid Thrasea non

fecerit. Aut transeamus ad illa instituta, si potiora sunt: aut nova cupientibus auferatur dux & auctor. Ista secta Tuberones & Favonios, veteri quoque Reipublicæ ingrata nomina, genuit. Ut Imperium evertant, libertatem præferunt: si perverterint, libertatem ipsam aggredientur. Frustra Casium amovisti, si gliscere & vigere Brutorum æmulos passurus es. Denique nihil ipse de Thrasea scripseris; disceptatorem Senatui nobis relinque.



O R A T I O
GALBÆ IMPERATORIS
AD P I S O N E M ,

Cum eum adoptaret.

Depulso Nerone, Galba militari suffragio lectus Imperator fuerat: parcus ac severus senex, & ad obcunda Imperii munia per ætatem invalidus. Cum se ob ea spernere intelligeret, accepissetque etiam Germanicas legiones sacramenti reverentiam rupisse, præsidium sibi, adoptato nobili & egregio viro Pisone Liciniano, parare statuit. Eum igitur accitum in hunc modum alloquitur.

151. SI te privatus, lege curiatâ, apud Pontifices, ut moris est, adoptarem; & mihi egregium erat tunc, Pompei

E ij

& M. Crassi sobolem in Penates meos ad-
fiscere; & tibi insigne, Sulpiciæ ac Luta-
tiæ decora nobilitati tuæ adjecisse. Nunc me
Deorum hominumque contentu ad impe-
rium vocatum præclara indoles tua, & amor
patriæ impulit, ut principatum, de quo ma-
jores nostri armis certabant, bello adeptus,
quiescenti offeram; exemplo divi Augusti,
qui sororis filium Marcellum, dein gene-
rum Agrippam, mox nepotes suos, postre-
mò Tiberium Neronem privignum, in pro-
ximo sibi fastigio collocavit. Sed Augustus
in domo successorem quæsit; ego in Re-
publica. Non quia propinquos aut socios
belli non habeam: sed neque ipse imperium
ambitione accepi; & judicii mei documen-
tum sint non meæ tantum necessitudines,
quas tibi postposui, sed & tuæ. Est tibi
frater pari nobilitate, natu major, dignus
hâc fortunâ, nisi tu potior esses. Ea ætas
tua, quæ cupiditates adolescentiæ jam effu-
gerit: ea vita, in qua nihil præteritum ex-
cusandum habeas. Fortunam adhuc tantum
adversam tulisti. Secundæ res acrioribus sti-
mulis animos explorant: quia miseriæ tole-
rantur, felicitate corrumpimur. Fidem, li-
bertatem, amicitiam, præcipua humani ani-
mi bona, tu quidem eâdem constantiâ reti-
nebis: sed alii per obsequium imminuent.
Irrumpet adulatio, blanditiæ; pessimum ve-
ri affectûs venenum, sua cuique utilitas.
Etiâ ego ac tu simplicissimè inter nos ho-
die loquimur; cæteri libentiùs cum fortuna
nostra, quàm nobiscum. Nam suadere Prin-
cipi quod oporteat, multi laboris: assenta-

tio erga Principem quemcumque, sine affectu peragitur. Si immensum Imperii corpus stare ac librari sine rectore posset, dignus eram à quo Respublica inciperet. Nunc eò necessitatis jampridem ventum est, ut nec mea senectus conferre plus Populo Romano possit, quàm bonum successorem: nec tua plus iuventa, quàm bonum Principem. Sub Tiberio, & Caio, & Claudio, unius familiæ quasi hereditas fuimus: loco libertatis erit, quòd eligi cœpimus. Et finitâ Juliorum Claudiorumque domo, optimum, quemque adoptio inveniet. Nam generari & nasci à Principibus fortuitum, nec ultrâ æstimatur: adoptandi iudicium integrum; &, si velis eligere, consensu monstratur. Sit ante oculos Nero, quem longâ Cæsarum serie tumentem, non Vindex cum inermi provincia, aut ego cum una legione, sed sua immanitas, sua luxuria cervicibus publicis depulere. Neque erat adhuc damnati Principis exemplum. Nos bello, & ab æstimantibus asciti, cum invidia, quamvis egregii, erimus. Ne tamen territus fueris, si duæ legiones, in hoc concussi orbis motu, nondum quiescunt. Ne ipse quidem ad securas res accessi: & auditâ adoptione, desinam videri senex, quod nunc mihi unum obijcitur. Nero à pessimo quoque semper desiderabitur: mihi ac tibi providendum est, ne etiam à bonis desideretur. Monere diutiùs, neque temporis hujus; & impletum est omne consilium, si te bene elegi. Utilissimus quidem ac brevissimus bonarum malarum.

que rerum delectus est, cogitare quid aut volueris sub alio Principe, aut nolueris. Neque enim hîc, ut in cæteris gentibus quæ regnantur, certa dominorum domus, & cæteri servi: sed imperaturus es hominibus qui nec totam servitutem pati possunt, nec totam libertatem.

O R A T I O

P I S O N I S

A D M I L I T E S,

I N O T H O N E M.

Otho flagitiis ac mollitie infamis, diuque gratus Neroni æmulatione luxûs, mox abalienatus est ab eo, & primus in partes Galbæ transgressus fuerat. Unde conceptâ spe adoptionis, postquam se delusum & Pisonem adoptari cognovit, hanc injuriam ulcisci statuit. Corruptis igitur per largitiones & promissa pessimis quibusque militum, qui in urbe erant, à viginti & tribus primò speculatoribus Imperator consalutatus, in castra Prætorianorum militum rapitur. Quo audito, cohortem quæ in palatio stationem agebat, in hunc modum Piso allocutus est.

156. **S**EXTUS dies agitur, commilitones, ex quo ignarus futuri, & sive optandum hoc nomen sive timendum erat.

Cæsar adscitus sum: quo domûs nostræ aut Reipublicæ fato, in vestra manu positum est. Non quia meo nomine tristiores casum paveam, ut qui adversas res expertus, cum maximè ducam ne secundas quidem minùs discriminis habere. Patris, & Senatûs, & ipsius Imperii vicem doleo, si nobis aut perire hodie necesse est, aut, quod æquè apud bonos miserum est, occidere. Solatium proximi motûs habebamus, incruentam urbem & res sine discordia translatas. Provisum adoptione videbatur, ut ne post Galbam quidem bello locus esset. Nihil arrogabo mihi nobilitatis aut modestiæ. Neque enim relatu virtutum, in comparatione Othonis, opus est. Vicia, quibus solis gloriatur, evertère Imperium, etiam quum amicum Imperatoris ageret. Habitune & incessu, an illo muliebri ornatu, mereretur imperium? Falluntur, quibus luxuria specio liberalitatis imponit. Perdere iste sciet, donare nesciet. Stupra nunc, & commissationes, & fœminarum cœtus volvit animo. Hæc principatûs præmia putat; quorum libido ac voluptas penes ipsum sit, rubor ac dedecus penes omnes. Nemo enim unquam imperium flagitio quæsitum, bonis artibus exercuit. Galbam consensus generis humani; me Galba, consentientibus vobis, Cæsarem dixit. Si Respublica & Senatus, & Populus, vana nomina sunt; vestrâ, commilitones, interest, ne Imperatorem pessimi faciant. Legionum seditio adversum duces suos audita est aliquando: vestra fides fa-

maque illæsa ad hunc diem mansit. Et Nero quoque vos destituit, non vos Neronem. Minus xxx transfugæ & desertores, quos Centurionem aut Tribunum sibi eligentes nemo ferret, imperium assignabunt? Admittitis exemplum? & quiescendo commune crimen facitis? Transcendet hæc licentia in provincias: & ad nos scelerum exitus; bellorum, ad vos pertinebunt. Nec est plus, quod pro cæde Principis, quàm quod innocentibus datur. Sed proinde à nobis donativum ob fidem, quàm ab aliis pro facinore accipietis.



O R A T I O

O T H O N I S

A D M I L I T E S.

Pisone & Galbâ interfectis, Otho Imperium invaserat. Sed Vitellio à Germanicis legionibus Imperatore consulutato, & cum ingentibus copiis adventante, ad bellum parabat. Quâdam autem die, cum armandæ cohortis unius causâ, Otho, incipiente nocte, vehicula oneranda aperto armamentario curabat, in suspicionem venit militibus familias Senatorum in perniciem Othonis armari: ac subito tumultuosè congregati palatium petunt, Senatūque universum ad cædem deposcunt. Otho precibus ac lacrimis ægrè militem cohibuit. Postera die eos sic alloquitur.

160. **N**Eque ut affectus vestros in amorem meum accenderem, commilitones; neque ut animum ad virtutem cohortarer (utraq; enim egregiè supersunt): sed veni postulaturus à vobis temperamentum vestræ fortitudinis, & erga me modum caritatis. Tumultus proximi initium, non cupiditate vel odio (quæ multos exercitus in discordiam egere) ac ne detractione quidem, aut formidine periculorum; nimia pietas vestra acrius quam considera-

E v

tiùs excitavit. Nam sæpe honestas rerum causas, ni iudicium adhibeas, perniciosi exitus consequuntur. Imus ad bellum. Non omnes nuncios palàm audiri, omnia consilia cunctis præsentibus tractari, ratio rerum, aut occasionum velocitas patitur. Tam nescire quædam milites, quàm scire oportet. Ita se ducum autoritas, sic rigor disciplinæ habet, ut multa etiam Centuriones Tribunosque tantùm juberi expediat. Si cur jubeantur, quærere singulis liceat, pereunte obsequio, etiam imperium intercidit. An & illic nocte intempestâ rapiuntur arma? Unus alterve perditus ac temulentus (neque enim plures consternatione proximâ insanisse crediderim) Centurionis ac Tribunî sanguine manus imbuet? Imperatoris sui tentorium irrumpet? Vos quidem istud pro me. Sed in discursu ac tenebris, & rerum omnium confusione, patefieri occasio etiam adversus me potest. Si Vitellio & satellitibus ejus eligendi facultas detur, quem nobis animum, quas mentes imprecentur? quid aliud, quàm seditionem & discordiam optabunt? ne miles Centurioni, ne Centurio Tribuno obsequatur: hinc confusi pedites equitesque, in exitium ruamus. Parendo potiùs, commitiones, quàm imperia ducum sciscitando, res militares continentur. Et fortissimus in ipso discrimine exercitus est, qui ante discrimen quietissimus. Vobis arma & animus sit: mihi consilium & virtutis vestræ regimen relinquite.

162. Paucorum culpa fuit, duorum pœna erit. Cæteri abolete memoriam fœdissimæ noc-

tis, nec illas adversus Senatum voces ullus unquam exercitus audiat. Caput Imperii, & decora omnium provinciarum ad pœnam vocare, non, hercle, illi, quos cum maximè Vitellius in nos ciet, Germani audeant. Ulline Italiæ alumni, & Romana verè juvenus, ad sanguinem & cædem deposcerent Ordinem, cujus splendore & gloriâ, sordes & obscuritatem Vitellianarum partium perstringimus? Nationes aliquas occupavit Vitellius: imaginem quandam exercitus habet: Senatus nobiscum est. Sic fit, ut hinc Respublica, inde hostes Reipublicæ constiterint. Quid? vos pulcherissimam hanc urbem, domibus & tectis & congestu lapidum stare creditis? Muta ista & inanima intercidere ac reparari promiscua sunt. Æternitas rerum, & pax gentium, & mea cum vestrâ salus, incolumitate Senatûs firmatur. Hunc auspiciato à parente & conditore urbis nostræ institutum, & à Regibus usque ad Principes continuum & immortalem, sicut à majoribus accepimus, sic posteris tradamus. Nam ut ex vobis Senatores, ita ex Senatoribus Principes nascuntur.



O R A T I O

MUCIANI

Vespasianum ad capeffendum Imperium adhortantis.

Mucianus Suriam & quatuor legiones obtinebat. Vespasianus obscuris natalibus, sed egregiâ virtute & famâ, bellum Judaicum tribus legionibus administrabat. Eum jam diu de invadendo Imperio cogitantem, ac tum maximè indignantem ab impurissimo homine Vitellio Rempublicam pollui, sed cunctantem adhuc & diversis pavoribus nutantem, Mucianus post multos secretosque sermones, jam & coram ita allocutus est.

165. **O**Mnes qui magnarum rerum consilia suscipiunt, æstimare debent, an quod inchoatur, Reipublicæ utile, ipsis gloriosum, aut promptum effectu, aut certè non arduum sit. Simul ipse qui suadet considerandus est, adjiciatne consilio periculum suum: & si fortuna cœptis affuerit, cui summum decus acquiratur. Ego te, Vespasiane, ad Imperium voco, tam salutare Reipublicæ, quàm tibi magnificum: juxta Deos, in tua manu positum est. Nec speciem adulantis expaveris: à contumelia quàm à laude propius fuerit,

post Vitellium eligi. Non adversus divi Augusti acerrimam mentem, nec adversus cautiſſimam Tiberii ſenectutem, nec contra Caii quidem, aut Claudii, vel Neronis fundatam longo imperio domum exſurgimus. Ceſſiſti etiam Galbæ imaginibus. Torpere ultra, & polluendam perdendamque Rempub. relinquere, ſopor & ignavia videretur, etiamſi tibi, quàm inhonèſta, tam tuta ſervitus eſſet. Abiit jam & tranſvectum eſt tempus, quo poſſes videri concupiſſe. Confugiendum eſt ad imperium. An excidit trucidatus Corbulo? ſplendidior origine quàm nos ſumus, fateor: ſed & Nero nobilitate natalium Vitellium antebat. Satis clarus eſt apud timentem, quifquis timetur. Et poſſe ab exercitu Principem fieri, ſibi ipſe Vitellius documento eſt, nullis ſtipendiis, nullâ militari famâ, Galbæ odio provectus. Ne Othonem quidem ducis arte, aut exercitûs vi, ſed præproperâ ipſius deſperatione victum, jam deſiderabilem & magnum Principem fecit. Cùm interim ſpargit legiones, exarmat cohortes, nova quotidie bello ſemina miniſtrat. Si quid ardoris ac ferociæ miles habuit, popinis, & comiſſationibus, & Principis imitatione deteritur. Tibi è Judæa & Syria & Ægypto novem legiones integræ, nullâ acie exhaustæ, non diſcordiâ corruptæ: ſed firmatus uſu miles, & belli domitor externi. Clauſum, alarum, cohortium robora, & fidiffimi Reges, & tua ante omnes experientia. Nobis nihil ultra arrogabo, quàm ne poſt Valentem ac Cæcinam au-

meremur. Ne tamen Mucianum socium spre-
veris, quia æmulum non experiris: me Vi-
tellio antepono, te mihi. Tux domui trium-
phale nomen; duo juvenes, capax jam im-
perii alter, & primis militiæ annis apud
Germanicos quoque exercitus clarus. Ab-
furdum fuerit, non cedere imperio ei cu-
jus filium adoptaturus essem, si ipse im-
perarem. Cæterum inter nos non idem pro-
perarum aduersarumque rerum ordo erit.
Nam si vincimus, honorem quem dederis
habebo: discrimen, ac pericula ex æquo
partiemur. Imò, ut melius est, tu hos
exercitus rege; mihi bellum, & præliorum
incerta trade. Acriore hodie disciplinâ victi,
quàm victores agunt. Hos ira, odium,
ultionis cupiditas ad virtutem accendit;
illi per fastidium & contumaciam hebescent.
Aperiet & recludet contexta & tumescen-
tia victricium partium vulnera bellum ip-
sum. Nec mihi major in tua vigilantia, par-
cimoniam, sapientiam, fiduciam est; quàm in
Vitellii torpore, inficitia, sævitia. Sed &
meliozem in bello causam, quàm in pace
habemus. Nam qui deliberant, desciverunt.



O R A T I O

G A L G A C I

Britannos ad pugnam erecto animo
capeffendam adhortantis.

Agricola, jam perdomitis cæteris gentibus nationibusque Britannia, in extremos hujus regionis recessus penetraverat, & adversus ferocem indomitumque populum pugnam parabat. Hostium ingentes erant copiae, ac super triginta millia armatorum convenerant. Gentis hujus dux virtute & genere præstans inter plures Galgatus, hæc oratione exercitus animum accendit.

168. **Q**UOTIES causas belli & necessitatem nostram intueor, magnus mihi animus est, hodiernum diem consensumque vestrum, initium libertatis totius Britannia fore. Nam & universi servitutis expertes & nullæ ultra terræ; ac ne mare quidem securum, imminente nobis classe Romanâ. Ita prælium atque arma quæ fortibus honesta, eadem etiam ignavis tutissima sunt. Priores pugnae quibus adversus Romanos variâ fortunâ certatum est, spem ac subsidium in nostris manibus habebant: quia nobilissimi totius Britannia, eoque in ipsis penetralibus siti, nec servientium lit-

tora aspicientes , oculos quoque à contactu dominationis inviolatos habebamus. Nos terrarum ac libertatis extremos , recessus ipse ac sinus famæ in hunc diem defendit. Nunc terminus Britanniae patet : atque omne ignotum pro magnifico est. Sed nulla jam ultra gens : nihil nisi fluctus & saxa ; & interiores Romani. Quorum superbiam frustra per obsequium & modestiam effugis. Raptores orbis , postquam cuncta vastantibus defuere terræ , & mare scrutantur : si locuples hostis est , avari : si pauper , ambitiosi : quos non oriens , non occidens satiaverit. Soli omnium opes atque inopiam pari affectu concupiscunt. Auferre , trucidare , rapere , falsis nominibus , imperium ; atque ubi solitudinem faciunt , pacem appellant. Liberos cuique ac propinquos suos natura carissimos esse voluit : hi per delectus , alibi servituri , auferuntur. Coniuges sororesque etsi hostilem libidinem effugiant , nomine amicorum atque hospitum polluantur. Bona fortunaesque in tributum egerunt ; in annonam , frumentum. Corpora ipsa ac manus , silvis ac paludibus emuniendis , verbera inter ac contumelias , conterunt. Nata servituti mancipia semel veneunt , atque ultra à dominis aluntur : Britannia servitutem suam quotidie emit , quotidie pascit. Ac sicut in familia recentissimus quisque servorum & conservis ludibrio est : sic in hoc orbis terrarum vetere famulatu , novi nos & viles , in excidium petimur. Neque enim arva nobis , aut metalla , aut portus sunt , qui-

bus exercendis reservemur. Virtus porro ac ferocia subjeutorum ingrata imperantibus. Et longinquitas ac secretum ipsum quò tutius, eò suspectius. Ita sublatâ spe veniæ, tandem sumite animum, tam quibus salus, quàm quibus gloria carissima est. Brigantes, foeminâ duce, exurere coloniam, expugnare castra, ac, nisi felicitas in socordiam vertisset, exuere jugum potuere: nos integri & indomiti, & libertatem non in præsentia laturo, primo statim congressu non ostendemus, quos sibi Caledonia viros seposuerit?

171. An eandem Romanis in bello virtutem, quam in pace lasciviam adesse creditis? Nostri illi diffensionibus ac discordiis clari, vitia hostium in gloriam exercitûs sui vertunt: quem contractum ex diversissimis gentibus, ut secundæ res tenent, ita adversæ dissolvent. Nisi si Gallor, & Germanorum, & (pudet dictu) Britannorum plerosque, dominationi alienæ sanguinem commodantes, diutiùs tamen hostes quàm servos, fide & affectu teneri putatis. Metus & terror est, infirma vincula caritatis: quæ ubi removeris, qui timere desierint, odisse incipient. Omnia victoriæ incitamenta pro nobis sunt. Nullæ Romanos conjuges accendunt: nulli parentes fugam exprobraturi sunt: aut nulla plerisque patria, aut alia est. Paucos numeros circum trepidos ignorantia, cælum ipsum ac mare & silvas, ignota omnia, circumspectantes; clausos quodammodo ac vinctos Dii nobis tradiderunt. Ne terreat

vanus aspectus, & auri fulgor atque argenti, quod neque tegit neque vulnerat. In ipsa hostium acie inuenimus nostras manus. Agnoscent Britanni suam causam: recordabuntur Galli priorem libertatem: deferent illos cæteri Germani, tanquam nuper Usipii reliquerunt. Nec quicquam ultrà formidinis: vacua castella, senum coloniæ, inter malè parentes & injustè imperantes ægra municipia & discordantia. Hic dux, hic exercitus: ibi tributa, & metalla, & cæteræ seruientium pœnæ: quas in æternum proferre, aut statim ulcisci, in hoc campo est. Proinde ituri in aciem, & majores vestros, & posteros cogitate.

O R A T I O


AGRICOLÆ,

*Suos adhortantis ante pugnam contra
Britannos.*

174. **O** Cravus annus est, commilitones, ex quo virtute & auspiciis Imperii Romani, fide atque operâ vestrâ Britanniam vicistis. Tot expeditionibus, tot præliis, seu fortitudine adversus hostes, seu patientiâ ac labore penè adversus ipsam rerum naturam opus fuit: neque me militum, neque vos ducis pœnituit. Ergo agressi, ego veterum Legatorum, vos prio-

rum exercituum terminos , finem Britannia non famâ nec rumore , sed castris & armis tenemus. Inventa Britannia , & subacta. Equidem in agmine , quum vos paludes montesve & flumina fatigarent , fortissimi cujusque vocem audiebam , quando dabitur hostis ? quando acies ? Veniunt à latebris suis extrusi. Et vota virtusque in aperto , omniaque prona victoribus , atque eadem victis adversa. Nam ut separasse tantum itineris , silvas evasisse , transisse æstuaria , pulchrum ac decorum in frontem ; ita fugientibus periculosissima , quæ hodie prosperrima sunt. Neque enim nobis aut locorum eadem notitia , aut commearium eadem abundantia : sed manus , & arma , & in his omnia. Quod ad me attinet , jampridem mihi decretum est , neque evadere , neque ducis terga tuta esse. Proinde & honesta mors turpi vitâ potior ; & incolumitas ac decus eodem loco sita sunt. Nec inglorium fuerit , in ipso terrarum ac naturæ fine cecidisse. Si novæ gentes atque ignota acies constitisset , aliorum exercituum exemplis vos hortarer. Nunc vestra decora recensete , vestros oculos interrogate. Ii sunt quos proximo anno unam legionem furto noctis aggressos , clamore debellastis : ii cæterorum Britannorum fugacissimi , ideoque tamdiu superstites. Quomodo silvas saltusque penetrantibus , fortissimum quodque animal , robore , pavida & inertia , ipso agminis sono pelluntur ; sic acerrimi Britannorum jampridem ceciderunt , reliquus est numerus ig-

navorum & metuentium. Quos quòd tantum invenistis, non restiterunt, sed comprehensi sunt novissimi: ideo extremo metu corpora defixere in his vestigiis, in quibus pulchram & spectabilem victoriam ederetis. Transfigite cum expeditionibus, imponite quinquaginta annis magnum diem. Approbate Reipublicæ nunquam exercitui imputari potuisse, aut moras belli, aut causas rebellandi.



ORATIONES

· E X

QUINTO-CURTIO

COLLECTÆ.

ORATIO

CHARIDEMI

AD DARIUM.

Darius cum statuisset acie cum Alexandro decernere, innumerabilem propè peditum equitumque turbam contraxerat. Cujus universæ aspectu admodum latus, Charidemum exulem Atheniensem percontari cœpit, satisne ei videretur instructus ad obtinendum hostem. At ille in hunc ferme modum respondit.

177. **V**erum & tu forsitan audire nolis; & ego, nisi nunc dixero, aliàs nequidquam confitebor. Hic tanti apparatus exercitus, hæc tot gentium & totius orientis excita sedibus suis moles, finiti-

mis potest esse terribilis. Nitet purpurâ ,
auroque , fulget armis & opulentia , quan-
tam qui oculis non subjecerint , animis
concipere non possunt. Sed Macedonum
acies torva sanè & inculta , clypeis hastis-
que immobiles cuneos , & conferta robora
virosum teger. Ipsi phalangem vocant pe-
ditum stabile agmen. Vir viro , armis ar-
ma conferta sunt : ad nutum monentis in-
tenti , sequi signa , ordines servare didice-
re. Quod imperatur , omnes exaudiunt :
obstistere , circumire , discurrere in cornu ,
mutare pugnam , non duces magis quàm
milites callent. Et ne auri argentique stu-
dio teneri putes , adhuc illa disciplina pau-
pertate magistrâ stetit. Fatigatis humus
cubile est. Cibus , quem occupant , satiat.
Tempora somni arctiora quàm noctis sunt.
Jam Thessali equites , & Acarnanes , Æto-
lique , invicta bello manus , fundis , credo ,
& hastis igne duratis repellentur. Pari ro-
bore opus est. In illa terra , quæ hos ge-
nuit , auxilia quærenda sunt. Argentum
istud atque aurum ad conducendum mili-
tem mitte.



V E R B A

C H A R I D E M I ,

Cum ad supplicium duceretur.

Darius veritatis impatiens , Charidemum abstrahi jussit ad capitale supplicium. Ille ne tum quidem libertatis oblitus , hac vociferabatur.

179. **H**Abeo paratum mortis meæ ultorem. Expetet pœnas mei consilii spreti ipse contra quem tibi suasi. Tu quidem licentiâ regni subitò mutatus , documentum eris posteris , homines , cum se permiscere fortunæ , etiam naturam dediscere.



V E R B A

A L E X A N D R I

GRAVITER ÆGROTANTIS.

Alexander cùm in Cydno amni calidum adhuc corpus abluisset, subito horrore rigentibus artubus, propè exanimis in tabernaculum defertur. Ubi paulùm laxata est vis morbi, anxius ac sollicitus animi, quòd Darium adventare nunciabatur, vocatos amicos Medicosque in hunc modum alloquitur.

130. **I**N quo me articulo rerum mearum fortuna deprehenderit, cernitis. Strepitum hostilium armorum exaudire mihi videor: & qui ultrò intuli bellum, jam provocor. Darius ergo cùm tam superbas litteras scriberet, fortunam meam in consilio habuit: sed nequidquam, si mihi arbitrio meo curari licet. Lenta remedia & segnes Medicos non expetunt tempora mea. Vel mori strenuè, quàm tardè convalescere, mihi melius est. Proinde, si quid opis, si quid artis in Medicis est: sciant me non tam mortis, quàm belli remedium quærere.

ORATIO

O R A T I O

LEGATORUM DARIÏ.

Alexander matrem & uxorem Darii prælio ad Iffum captas omni honore coluerat. Atque etiam Darii conjugii & mortuæ inlucrimavit, & regium funus, patrio Persarum more, summâ magnificentiâ instruxit. Quæ cum accepisset Darius, victus clementiâ ac clementiâ hostis, ad novas pacis conditiones ferendas Legatos misit. E quibus maximus natu ita cepit.

181. **D**Arium ut pacem à te jam hâc tertio peteret, nulla vis subegit: sed iustitia & continentia tua expressit. Matrem, conjugem, liberosque ejus, nisi quòd sine illo sunt, captos esse non sensit: pudicitia earum quæ supersunt, curam haud secus quàm parens agens, Reginas appellas; speciem pristinae fortunæ retinere pateris. Vultum tuum video, qualis Darii fuit quum dimitteremur ab eo: & ille tamen uxorem, tu hostem luges. Jam in acie stares, nisi cura te sepulturæ ejus moraretur. Et quid mirum est, si tam ab amico animo pacem petit? quid opus est armis, inter quos odia sublata sunt? Antea Imperio tuo destinabat Halyn amnem, qui Lydiam terminat. Nunc quidquid inter Hellespontum & Euphratem est, in dotem

Pars II.

F

filiaë offert, quam tibi tradit. Ochum filium, quem habes, pacis & fidei obsidem retine: matrem & duas virgines filias redde: pro tribus corporibus tria millia talentum auri precatur accipias. Nisi moderationem animi tui notam haberem, non dicerem hoc esse tempus, quo pacem non dare solum, sed etiam occupare deberes. Respice quantum post te reliqueris; intueere quantum petas. Periculosum est prægrave Imperium: difficile est continere, quod capere non possis. Videsne ut navigia quæ modum excedunt, regi nequeant? Nescio an Darius ideo tam multa amiserit, quia nimis opes, magnæ jacturæ locum faciunt. Facilius est quædam vincere, quàm tueri. Quàm hercule expeditius manus nostræ rapiunt, quàm continent! Ipsa mors uxoris Darii te admonere potest minùs jam misericordiæ tuæ licere, quàm licuit.

O R A T I O

ALEXANDRI,

LEGATIS DARIÏ

Respondentis.

384. **N**Unciate Dario, me quæ fecerim clementer & liberaliter, non amicitiaë ejus tribuisse, sed pietatæ meæ. Bellum cum captivis & feminis gerere non

soleo. Armatus sit oportet, quem oderim. Quodd si saltem pacem bonâ fide peteret; deliberarem forsitan an darem. Verum enim verò, quum modò milites meos litteris ad prodicionem, modò amicos ad perniciem meam pecuniâ sollicitet: ad internecionem mihi persequendus est, non ut justus hostis, sed ut percussor & veneficus. Conditiones verò pacis quas fertis, si accepero, victorem eum faciunt. Quæ post Euphratem sunt, liberaliter donat: ubi igitur me adfamini? nempe ultra Euphratem sum. Summum ergo dotis, quam promittit, terminum castra mea transeunt. Hinc me depellite, ut sciam vestrum esse, quod ceditis. Eâdem liberalitate dat mihi filiam suam: nempe quam scit alicui servorum suorum nupturam. Multum verò mihi præstat, si me Mazæo generum præponit! Ite, nunciate Regi vestro & quæ amisit, & quæ adhuc habet, præmia esse belli: hûc rege utriusque terminos regni, id quemque habiturum, quod proximæ lucis assignatura fortuna est: & me in Asiam non venisse ut ab aliis acciperem; sed ut aliis darem.



O R A T I O

D A R I I

A D M I L I T E S

Jamjam propè Arbelam pugnatueros.

185. **T**errarum quas Oceanus hinc alluit, illinc claudit Hellespontus, paulò antè dominis, jam non de gloria, sed de salute, & quod saluti præponitis, de libertate, pugnandum est. Hic dies Imperium, quo nullum amplius vidit ætas, aut constituet, aut finiet. Apud Granicum minimâ virium parte cum hoste certavimus: in Cilicia victos Syria poterat excipere: magna munimenta regni Tigris atque Euphrates erant. Ventum est eò, unde pulsus ne fugæ quidem locus est. Omnia tam diutino bello exhausta post tergum sunt: non incolas suos urbes, non cultores habent terræ. Conjuges quoque & liberi sequuntur hanc aciem: parata hostibus præda, nisi pro carissimis pignoribus corpora opponimus. Quod mearum fuit partium, exercitum, quem penè immensa planities vix caperet, comparavi: equos, arma distribui: commeatus, ne tantæ multitudini deessent, providi: locum in quo acies explicari posset, elegi. Cætera in vestra potestate sunt: audete modò vince-

re ; famamque , infirmiffimum adversùs fortes viros telum , contemnite. Temeritas est , quam adhuc pro virtute timuistis : quæ ubi primum impetum effudit , velut quædam animalia amisso aculeo , torpet. Hi verò campi deprehendere paucitatem , quam Ciliciæ montes absconderant. Videtis ordines raros , cornua extenta , mediam aciem vanam & exhaustam. Nam ultimi , quos locavit averfòs , terga jam præbent. Obterimerehunc equorum ungulis possunt ; etiamsi nil præter falcatos currus emisero. Et bello vicerimus , si vincimus prælio : nam ne illis quidem ad fugam est locus : hinc Euphrates , illinc Tigris , prohibet inclusos. Et quæ antea pro illis erant , in contrarium conversa sunt. Nostrum mobile & expeditum agmen est ; illud prædâ grave. Implicatos ergo spoliis nostris trucidabimus : eademque res & causa victoriæ erit , & fructus. Quòd si quem è vobis nomen gentis movet , cogitet Macedonum illic arma esse , non corpora. Multùm enim sanguinis invicem hausimus ; & semper gravior in paucitate jactura est. Jam Alexander , quantuscumque ignavis & timidus videri potest , unum animal est : & , si quid mihi creditis , temerarium & vecors , adhuc nostro pavore , quàm suâ virtute felicius. Nihil autem potest esse diuturnum , cui non subest ratio. Licet felicitas aspirare videatur , tamen ad ultimum temeritati non sufficit. Præterea breves & mutabiles vices rerum sunt : & fortuna nunquam simpliciter indulget. Forsitan ita Dii fata ordi-

naverunt, ut Persarum Imperium, quod secundo cursu per ducentos triginta annos ad summum fastigium evexerant, magno motu concuterent magis, quàm affligerent, admonerentque nos fragilitatis humanæ, cujus nimia in prosperis rebus oblivio est. Modò Græcis ultro bellum inferebamus: nunc in sedibus nostris propulsamus illatum. Jactamur invicem varietate fortunæ. Videlicet Imperium, quod mutuo affectamus, una gens non capit.

189. Cæterum, etiamsi spes non subesset; necessitas tamen stimulare deberet. Ad extrema perventum est. Matrem meam; duas filias; Ochum in spem hujus Imperii genitum; illos Principes, illam sobolem regiæ stirpis; duces vestros Regum instar, victos habet: nisi quod in vobis est, ipse ego majore parte captivus sum. Eripite viscera mea ex vinculis. Restituite mihi pignora, pro quibus ipse mori non recuso; parentem, liberos: nam conjugem in illo carcere amisi. Credite nunc omnes tendere ad vos manus; implorare patrios Deos; opem vestram, misericordiam, fidem exposcere: ut servitute, ut compedibus, ut precario victu ipsos liberetis. An creditis æquo animo iis servire, quorum Reges esse fastidiant? Video admoveri hostium aciem: sed quò propius discrimen accedo; hoc minùs iis quæ dixi, possum esse contentus. Precor vos per Deos patrios æternumque ignem, qui præfertur altaribus; fulgoremque Solis intra fines regni mei orientis; per æternam memoriam Cyri, qui

ademptum Medis Lydisque Imperium primus
in Persidem intulit : vindicate ab ultimo
dedecore nomen gentemque Persarum. Ite
alacres & spe pleni , ut quam gloriam ac-
cepistis à majoribus vestris , posteris relin-
quatis. In dextris vestris jam libertatem ,
opem , spem futuri temporis geritis. Ef-
fugit mortem , quisquis contempserit : ti-
midissimum quemque consequitur. Ipse non
patrio more solùm , sed etiam ut conspici
possim , curru vehor : nec recuso quomi-
nus imitemini me , siue fortitudinis exem-
plum , siue ignaviæ fuero.



ORATIO

EUTHYMONIS

AD GRÆCOS

FŒDÈ A PERSIS MUTILATOS,

Ne in patriam redire velint.

Accedenti ad urbem Persopolim Alexandro occurrere opem ejus implorantes Græci ad quatuor millia ferè, quos Persæ ferociter vario suppliciorum modo affecerant, aliorum pedibus, quorumdam manibus auribusque amputatis. Rex bonum habere animum jubet: visuros urbes suas conjugesque. Hòc accepto responso, secessere Græci, deliberaturi quid agerent; an sedes in Asia, an reverti domos rogarent. Euthymon Cymæus unus ex iis ita locutus ad eos fertur.

194. **H**I qui modò ad opem petendam ex tenebris & carcere procedere erubuimus; ut nunc est, supplicia, (quorum nos pudeat magis an pœniteat, incertum est) ostentare Græciæ velut lætum spectaculum cupimus. At ii optimè miserias ferunt, qui abscondunt: nec ulla est tam familiaris infelicibus patria, quàm solitudo & statùs prioris obliuio. Nam qui

multum in suorum misericordia ponunt , ignorant quam celeriter lacrymæ inarescant. Nemo fideliter diligit , quem fastidit : nam & calamitas querula est , & superba felicitas. Itaque suam quisque fortunam in consilio habet , quum de aliena deliberat : & , nisi mutuo essemus miseri , olim alius alii potuissemus esse fastidio. Quid mirum est fortunatos semper parem quærere ? Obsecro vos , olim vitâ defuncti , quæramus locum , in quo hæc semesa membra obruamus ; ubi horribiles cicatrices celet exilium. Grati prorsus conjugibus , quas juvenes duximus , revertemur. Liberi in flore & ætatis & rerum agnoscent ut patres , ergastuli detrimenta ? Et quota pars nostrî tot obire terras potest ? Procul Europâ in ultima Orientis relegati , senes , debiles , majore membrorum parte mulctati , tolerabimus scilicet , quæ armatos & victores fatigaverunt. Conjuges deinde , quas captis fors & necessitas unicum solatium applicuit , parvosque liberos trahimus nobiscum , an relinquimus ? Cum his venientes nemo agnoscere volet. Relinquemus ergo extemplo præsentia pignora , quum incertum sit , an visuri simus ea quæ petimus ? Inter hos latendum est , qui nos miseros nosse cœperunt.



O R A T I O

D A R I I

I N C O N C I L I O.

Darius post infelicem pugnam ad Arbela multas vastasque regiones præcipiti fugâ emensus, hoste in vestigiis ejus semper hærente, experiri adhuc certaminis fortunam statuit. Quadraginta propè hominum millia sequebantur. Igitur concilio advocato, ita differuit.

197. **S**I me cum ignavis & pluris qualem-
cunque vitam honestâ morte æsti-
mantibus fortuna junxisset; tacerem po-
tius, quàm frustra verba consumerem. Sed
majore quàm vellem documento, & virtu-
tem vestram, & fidem expertus; magis
etiam conniti debeo, ut dignus talibus
amicis sim, quàm dubitare an vestri simi-
les adhuc sitis. Ex tot millibus, quæ sub
imperio fuerunt meo, bis me victum, bis
me fugientem persequuti estis. Fides ves-
tra & constantia, ut Regem me esse cre-
dam, facit. Proditores & transfugæ in ur-
bibus meis regnant: non Hercule quia tanto
honore digni habeantur, sed ut præmiis
eorum vestri sollicitentur animi. Meam ta-
men fortunam, quàm victoris, maluistis
sequi; dignissimi quibus, si ego non pos-

sim, Dii pro me gratiam referant. Et me-
 hercule referent. Nulla erit tam furda pos-
 teritas, nulla tam ingrata fama, quæ non
 in Cœlum vos debitis laudibus ferat. Ita-
 que etiam si consilium fugæ, à qua multum
 abhorret animus, agitaſsem; veſtrâ tamen
 virtute fretus, obviâ iſſem hoſti. Quouſ-
 que enim in regno exulabo, & per fines
 Imperii mei fugiam externum & advenam
 Regem? quum liceat experto belli fortu-
 nam, aut reparare quæ amiſi, aut honeſtâ
 morte deſungi. Niſi fortè ſatius eſt expec-
 tare victoris arbitrium; &, Mazæi & Mi-
 threnis exemplo, precarium accipere reg-
 num nationis unius: ut jam malit ille glo-
 riæ ſuæ, quàm iræ obſequi. Nec Dii ſive-
 rint, ut hoc decus mei capitis aut demere
 mihi quiſquam, aut condonare poſſit: nec
 hoc Imperium vivus amittam: idemque
 erit regni mei, qui & ſpiritus, finis. Si
 hic animus, ſi hæc lex, nulli non parta
 libertas eſt: nemo è vobis ſaſtidium Ma-
 cedonum, nemo vultum ſuperbum ferre
 cogetur. Sua cuique dextra aut ultionem
 tot malorum pariet, aut finem. Equidem,
 quàm verſabilis fortuna ſit, documentum
 ipſe ſum. Nec immeritò mitiores vices ejus
 expecſto. Sed ſi juſta ac pia bella Dii aver-
 ſantur; fortibus tamen viris licebit honeſtè
 mori. Per ego vos decora majorum, qui
 totius Orientis regna cum memorabili laude
 tenuerunt; per illos viros, quibus ſtipen-
 dium Macedonia quondam tulit; per tot
 navium claſſes in Græciam miſſas; per tot
 trophæa Regum, oro & obteſtor, ut no-

bilitate vestrâ gestisque dignos spiritus capiatis : ut eâdem constantiâ animorum , quâ præterita tolerastis , experiamini quidquid deinde fors tulerit. Me certè in perpetuum aut victoria egregia nobilitabit , aut pugna.

O R A T I O

A L E X A N D R I

A D A M I C O S ,

De suscipienda in Scythas expeditione.

Bactriani defecerant : Scythæ, etiam laceſcebant. Alexander non ita pridem graviter vulneratus , non inſiſtere in terra , non equo vehi poterat. Tamen advocatis amicis , ſibi eſſe in animo ait , flumen , quo tum à Scythiſ dividebatur , trajicere , & arma in Scythiam ultrò proferre.

201. **D**ilectum me occupavit meliore hostium , quàm meo tempore. Sed necessitas ante rationem est : maximè in bello , quo rarò permittitur tempora eligere. Defecere Bactriani , in quorum cervicibus stamus ; & , quantum in nobis animi sit , alieno Marte experiuntur. Haud dubiè si omiserimus Scythas ultrò arma inferentes , contemti ad illos qui defecerunt , revertemur. Si verò Tanaïm transferimus , & ubique invictos eſſe nos Scytharum

pernicie ac sanguine ostenderimus, quis dubitabit patere etiam Europam victoribus? Fallitur, qui terminos gloriæ nostræ metitur spatio quod transcurri sumus. Unus annis interfluit, quem si trajicimus, in Europam arma proferimus. Et quanti æstimandum est, dum Asiam subigimus, in alio quodammodo orbe trophæa statuere: & quæ tam longo intervallo natura videtur diremisisse, unâ victoriâ subito committere? At Hercule si paululum cessaverimus, in tergis nostris Scythæ hærebunt. An soli sumus qui flumina transnare possumus? Multa in nosmetipsos recident quibus adhuc vicimus. Fortuna belli artem victos quoque docet. Utribus annum trajiciendi exemplum fecimus nuper: hoc ut Scythæ imitari nesciant, Bactriani docebunt. Præterea unus gentis hujus adhuc exercitus venit; cæteri expectantur. Ita bellum vitando alemus; & quod inferre possemus, accipere cogemur. Manifesta est consilii mei ratio: sed an permissuri sint Macedones animo uti meo, dubito; quia ex quo hoc vulnus accepi, non equo vectus sum, non pedibus ingressus. Sed si me sequi vultis, valeo, amici; satis virium est ad toleranda ista: aut si jam adest vitæ meæ finis, in quo tandem opere melius extinguar?



O R A T I O

SCYTHARUM

A D A L E X A N D R U M.

Jam omnia ad trajiciendum flumen Macedones aptarant , moxque cum Scythis pugnaturi erant , cùm gentis hujus Legati ad Alexandrum viginti veniunt. Ex his maximus natu in hunc modum locutus est.

204. **S**I Dii habitum corporis tui aviditati animi parem esse voluissent , orbis te non caperet : alterâ manu Orientem , alterâ Occidentem contingeres : & hoc affectus , scire velles ubi tanti numinis fulgor conderetur. Sic quoque , concupiscis quæ non capis. Ab Europa petis Asiam , ex Asia transis in Europam : deinde , si humanum genus omne superaveris , cum sylvis , & nivibus , & fluminibus , ferisque bestiis gesturus es bellum. Quid ? tu ignoras arbores magnas diu crescere , unâ horâ extirpari ? Stultus est , qui fructus earum spectat , altitudinem non metitur. Vide ne , dum ad cacumen pervenire contendis , cum ipsis ramis , quos comprehenderis , decidas. Leo quoque aliquando minimarum avium pabulum fuit : & ferrum rubigo consumit. Nihil tam firmum est , cui periculum non sit etiam ab invalido.

Quid nobis tecum est? nunquam terram tuam attigimus. Qui sis, unde venias, licetne ignorare in vastis sylvis viventibus? Nec servire ulli possumus, nec imperare desideramus. Dona nobis data sunt (ne Scytharum gentem ignores) jugum boïum, aratrum, & sagitta, & patera. His utimur & cum amicis, & adversus inimicos. Fruges amicis damus boïum labore quæsitæ: paterâ cum his vinum Diis libamus: inimicos sagittâ eminus, hastâ cominus petimus. Sic Syriæ Regem, & postea Persarum Medorumque superavimus; patuitque nobis iter usque in Ægyptum. At tu, qui te gloriaris ad latrones persequendos venire; omnium gentium, quas adisti, latro es. Lydiam cepisti, Syriam occupasti, Persidem tenes, Bactrianos habes in potestate, Indos peristi: jam etiam ad pecora nostra avaras & instabiles manus porrigis. Quid tibi divitiis opus est, quæ te esurire cogunt? Primus omnium satietate parasti famem; ut quod plura habes, acrius, quæ non habes cuperes. Non succurrit tibi, quamdiu circum Bactra hæreas? Dum illos subigis, Sogdiani bellare cœperunt: bellum tibi ex victoria nascitur. Nam ut major fortiorque sis quàm quisquam; tamen alienigenam dominum pati nemo vult. Transi modò Tanaïm; scies quàm latè pateant, nunquam tamen consequeris Scythas: paupertas nostra velocior erit, quàm exercitus tuus, qui prædam tot nationum vehit. Rursus quum procul abesse nos credes, videbis in tuis castris: eâdem velocitate &

sequimur , & fugimus. Scytharum solitudines Græcis etiam proverbiiis audio cludi. At nos deserta & humano cultu vacua , magis quàm urbes & opulentos agros sequimur. Proinde fortunam tuam pressis manibus tene. Lubrica est , nec invita teneri potest. Salubre consilium , sequens quàm præsens tempus ostendet melius. Impone felicitati tuæ frænos ; faciliùs illam reges. Nostri sine pedibus dicunt esse fortunam , quæ manus & pennas tantùm habet : quum manus porrigit , pennas quoque comprehendere non sinit. Denique si Deus es , tribuere mortalibus beneficia debes , non sua eripere : sin autem homo es ; id quod es , semper esse te cogita. Stultum est eorum meminisse propter quæ tuî oblivisceris. Quibus bellum non intuleris , bonis amicis poteris uti : nam & firmissima est inter pares amicitia ; & videntur pares , qui non fecerunt inter se periculum virium. Quos viceris , amicos tibi esse , cave credas : inter dominum & servum nulla amicitia est : etiam in pace , belli tamen jura servantur. Jurando gratiam Scythas sancire ne credideris : colendo fidem , jurant. Græcorum ista cautio est , qui pacta consignant , & Deos invocant : nos religionem in ipsa fide novimus. Qui non reverentur homines , fallunt Deos. Nec tibi amico opus est , de cujus benevolentia dubites. Cæterùm , nos & Asiæ & Europæ custodes habebis : Bactra , nisi dividat Tanais , contingimus : ultra Tanaim usque ad Thraciam colimus : Thraciæ Macedoniam conjunctam esse fama est.

Utrique Imperio tuo finitimos, hostes aut amicos velis esse, considera.

O R A T I O

CALLISTHENIS PHILOSOPHI

ADVERSUS CLEONEM,

Qui divinos honores Alexandro haberi
jubebat.

Alexander jamdiu, quonam modo cælestes honores usurparet, agitabat. Igitur celebri convivio, cui Græcos Principes unà cum Satrapis adhibuerat, cùm paulisper epulatus excessisset, tum Cleo quidam venalis & assentatoriæ linguæ, ex composito sermonem cum admiratione laudum ejus instituit: hortatur ut Alexandrum, sicut Deum, more Persarum, adorarent. Erat inter convivas Callisthenes Philosophus: odiosum Cleonis sermonem hâc tum oratione vehementer respuit.

210. **S**I Rex sermoni tuo adfuisset, nullius profectò vox responsuri tibi desideraretur: ipse enim peteret, ne in peregrinos ritus degenerare se cogeres, neu rebus felicissimè gestis invidiam tali adulatione contraheres. Sed quoniam abest, ego tibi pro illo respondeo, nullum esse eum-

dem & diuturnum & præcoccem fructum ;
cœlestesque honores non dare te Regi , sed
auferre. Intervallo enim opus est , ut cre-
datur Deus ; semperque hanc gratiam mag-
nis viris posterì reddunt. Ego autem seram
immortalitatem precor Regi ; ut vita diutur-
na sit , & æterna majestas. Hominem con-
sequitur aliquando , nunquam comitatur di-
vinitas. Herculem modò & patrem Libe-
rum consecratæ immortalitatis exempla re-
ferebas. Credisne illos unius convivii de-
creto Deos factos ? Priùs ab oculis morta-
lium amolita natura est , quàm in Cœlum
fama perveheret. Scilicet ego & tu , Cleo ,
Deos facimus ! à nobis divinitatis suæ aucto-
ritatem accepturus est Rex ! Potentiam tuam
experiri libet : fac aliquem Regem , si Deum
potes facere : faciliùs est Imperium dare ,
quàm Cœlum. Dii propitii sine invidia , quæ
Cleo dixit , audierint ; eodemque cursu , quo
fluxere res , ire patiantur : nostris moribus
velint nos esse contentos. Non pudet pa-
triæ ; nec desidero , ad quem modum Rex
mihi colendus sit , à victis discere : quos
equidem victores esse confiteor , si ab illis
leges , queis vivamus , accipimus,



O R A T I O

ALEXANDRI,

Milites ad penetrandum in interiora
Indiæ cohortantis.

*Alexander, Poro superato, Hydaspæ amno
trajecto, ad fluvium Hypasini processit. Ibi
per vastas solitudines ultra flumen iter esse
cognoscit; deinde Gangis fluvii ripam in-
numerabilibus copiis, dum veniret, obsi-
deri; hunc exercitum tria elephantorum
millia secum ducere; jamque tandem ma-
jora præteritis ipsi adeunda pericula. Nihil
ea retardabant avidum periculi ac gloriæ
Alexandri animum. Sed Macedones exter-
ritos esse veritus, hæc oratione eos incendere
conatur.*

213. **N**on ignoro, milites, multa quæ
terrere vos possent, ab incolis
Indiæ per hos dies de industria esse jacta-
ta: sed non est improvisa vobis mentien-
tium vanitas. Sic Ciliciæ fauces, sic Me-
sopotamiæ campos, sic Tigrim & Euphra-
tem, quorum alterum vado transivimus,
alterum ponte, terribilem fecerant Persæ.
Nunquam ad liquidum fama perducitur:
omnia, illâ tradente, majora sunt vero:
nostra quoque gloria, quum sit ex solido,
plus tamen habet nominis, quàm operis.

Modò quis belluas offerentes mœnium speciem, quis Hydaspem amnem, quis cætera auditu majora quàm vero, sustinere posse credebat? Olim Hercule fugissemus ex Asia, si nos fabulæ debellare potuissent. Creditisne elephantorum greges majores esse, quàm usquam armentorum sunt? quum & rarum sit animal, nec faciliè capiatur, multòque difficiliùs mitigetur. Atqui eadem vanitas copias peditum equitumque numeravit. Jam flumen, quò latius fusum est, hòc placidiùs stagnat: quippe angustis ripis coërcita, & in angustiore alveum elisa, torrentes aquas invehunt: contrà, spatio alvei segnior cursus est. Præterea in ripa omne periculum est, ubi applicantes navigia hostis expectat. Ita quantumcumque flumen intervenit, idem futurum discrimen est evadentium in terram. Sed omnia ista vera esse signamus: utrumne vos magnitudo belluarum, an multitudo hostium terret? Quod pertinet ad elephantos, præsens habemus exemplum: in suos vehementiùs quàm in nos incurrerunt; tam vasta corpora securibus falcibusque mutilata sunt. Quid autem interest totidem sint, quot Porus habuit, an tria millia? quum uno aut altero vulneratis, cæteros in fugam declinare videamus. Inde paucos quoque incommodè regunt: congregata verò tot millia ipsa se elident; ubi nec stare, nec fugere potuerint inhabiles vastorum corporum moles. Equidem sic animalia ista contemsi, ut, quum haberem, ipse non opposuerim: satis gnarus plus suis, quàm hostibus periculi inferre.

216. At enim equitum peditumque multitudo vos commovet ! Cum paucis enim pugnare soliti estis , & nunc primum inconditam sustinebitis turbam. Testis adversus multitudinem invicti Macedonum roboris Granicus amnis ; & Cilicia inundata cruore Persarum ; & Arbela , cujus campi devictorum à nobis ossibus strati sunt. Serò hostium legiones numerare cœpistis , postquam solitudinem in Asia vincendo fecistis. Quum per Hellespontum navigaremus , de paucitate nostra cogitandum fuit : nunc nos Scythæ sequuntur ; Bactriana auxilia præstò sunt ; Dahæ Sogdianique inter nos militant. Nec tamen illi turbæ confido : vestras manus intueor ; vestram virtutem , rerum , quas gesturus sum , vadem prædemque habeo : quamdiu vobiscum in acie stabo , nec meos nec hostium exercitus numeravero : vos modò animos mihi plenos alacritatis ac fiduciæ adhibete. Non in limine operum laborumque nostrorum , sed in exitu stamus : pervenimus ad solis ortum & Oceanum : nisi obstat ignavia , inde victores , perdomito sine terrarum , revertemur in patriam. Nolite , quod pigri agricolæ faciunt , maturos fructus per inertiam è manibus amittere. Majora sunt periculis præmia : dives eadem & imbellis est regio. Itaque non tam ad gloriam vos duco , quàm ad prædam. Digni estis , qui opes , quas illud mare littoribus invehit , referatis in patriam : digni , qui nihil inexpertum , nihil metu omissum relinquatis.

217. Per ego vos gloriamque vestram , quâ humanum fastigium exceditis ; perque & mea in vos , & in me vestra merita , quibus invicti contendimus , oro quæsoque , ne humanarum rerum terminos ad-euntem alumnum commilitonemque vestrum , ne dicam Regem , deseratis. Cætera vobis imperavi ; hoc unum debiturus sum. Et is vos rogo , qui nihil unquam vobis præcepi , quin primus me periculis obtulerim ; qui sæpe aciem clypeo meo texi. Ne infregeritis in manibus meis palmam , quâ Herculem Liberumque patrem , si invidia abfuerit , æquabo. Date hoc precibus meis , & tandem obstinatum silentium rumpite. Ubi est ille clamor alacritatis vestræ index ? ubi ille meorum Macedonum vultus ? Non agnosco vos , milites : nec agnosci videor à vobis : surdas jamdudum aures pulso : averfos animos & infractos excitare conor. *Quumque illi , in terram demissis capitibus , tacere perseverarent ;* Nescio quid , *inquit* , imprudens in vos deliqui , quòd me ne intueri quidem vultis : in solitudine mihi videor esse : nemo responderet ; nemo saltem negat. Quos alloquor ? quid autem postulo ? vestram gloriam & magnitudinem vindicamus. Ubi sunt illi , quorum certamen paulò antè vidi , contendentium , qui potissimum vulnerati Regis corpus exciperent ? Desertus , destitutus sum , hostibus deditus. Sed solus quoque ire perseverabo : objicite me fluminibus & belluis , & illis gentibus , quarum nomina horretis : inveniam qui desertum à vobis sequantur. Scythæ

Bactrianique erunt mecum, hostes paulò antè, nunc milites nostri. Mori prætat, quàm precariò Imperatorem esse. Ite reduces domos; ite deserto Rege ovantes. Ego hîc à vobis desperatæ victoriæ, aut honestæ morti locum inveniam.

RESPONSUM

C Æ N I ,

Unius inter primarios exercitûs ducis.

210. **D**li prohibeant à nobis impias mentes; & profectò prohibent. Idem animus est tuis, qui fuit semper, ire quò jusseris, pugnare, periclitari, sanguine nostro commendare posteritati tuum nomen. Proinde si perseveras, inermes quoque, & nudi, & exsanguis, utcumque tibi cordi est, sequimur vel anteceditur. Sed si audire vis non fictas tuorum militum voces, verùm necessitate ultimâ expressas; præbe, quæso, propitias aures imperium atque auspiciu tuu constantissimè sequutis, &, quòcumque pergis, sequuturis. Vicisti, Rex, magnitudine reru non hostes modò, sed etiam milites: quidquid mortalitas capere poterat, implevimus: emensis maria terrasque, meliùs nobis, quàm incolis, omnia nota sunt: penè in ultimo mundi fine consistimus. In aliu orbem ire paras, & Indiam quæris Indis quoque ignotam: inter

eras serpentesque degentes eruere ex latebris & cubilibus suis expetis, ut plura, quàm sol videt, victoriâ lustres. Digna prorsus cogitatio animo tuo; sed altior nostro: virtus enim tua semper in incremento erit; nostra vis in fine jam est. Intuere corpora exsanguia, tot perfossa vulneribus, tot cicatricibus putria. Jam tela hebetia sunt; jam arma deficiunt. Vestem Persicam induimus, quia domestica subvchi non potest: in externum degeneravimus cultum. Quot cuique lorica est? quis equum habet? jube quæri quàm multos servi ipsorum persequuti sunt; quid cuique supersit ex præda. Omnium victores, omnium inopes sumus. Nec luxuriâ laboramus, sed bello instrumenta belli consumpsimus. Hunc tu pulcherrimum exercitum nudum objicies belluis? quarum ut multitudinem augeant de industria Barbari, magnum tamen esse numerum etiam ex mendacio intelligo. Quòd si adhuc penetrare in Indiam certum est; regio à meridie minùs vasta est: quâ subactâ, licebit decurrere in illud mare, quod rebus humanis terminum voluit esse natura. Cur circumitu petis gloriam, quæ ad manum posita est? hîc quoque occurrit Oceanus: nisi mavis errare, pervenimus quò tua fortuna ducit. Hæc tecum, quàm sine te cum his, loqui malui, non ut inirem circumstantis exercitûs gratiam, sed ut vocem loquentium potiùs, quàm ut gemitum murmurantium audires.

ORATIO

O R A T I O
A L E X A N D R I
A D A M I C O S ,

Ne tam sese in aperta pericula immitteret, orantes.

Alexander dum oppugnaret oppidum in India, gravissimè vulneratus fuerat. Cùm propè jam convalescisset, amici orant ne tanta posthac adiret pericula. Hæc respondit.

223. **V**Obis quidem, ô fidissimi, piissimique civium, atque amicorum, grates agò habeoque; non solum eo nomine, quòd hodie salutem meam vestræ præponitis; sed quòd à primordiis belli nullum erga me benevolentiae pignus, atque indicium omisistis: adeo ut confitendum sit, nunquam mihi vitam meam fuisse tam caram, quàm esse cœpit, ut vobis diu frui possim. Cæterùm, non eadem est cogitatio eorum, qui pro me mori optant, & mea: qui quidem hanc benevolentiam vestram virtute meruisse judico. Vos enim diuturnum fructum ex me, forsitan etiam perpetuum percipere cupitis: ego me metior non ætatis spatio, sed gloriæ. Licuit paternis opibus contento intra Macedoniæ terminos per otium corporis expectare obscuram &

Pars II. G

ignobilem senectutem. Quanquam ne pigri quidem sibi fata disponunt : sed unicum bonum diuturnam vitam æstimantes sæpe acerba mors occupat. Verùm ego , qui non annos meos , sed victorias numero ; si munera fortunæ bene computo , diu vixi. Orsus à Macedonia Imperium , Græciam teneo : Thraciam & Illyrios subegi : Tribal- lis , Mædisque imperito : Asiam , quæ Hellesponto , quæ Rubro mari alluitur , possideo. Jamque haud procul absum à fine mundi ; quem egressus , aliam naturam , alium orbem aperire mihi statui. Ex Asia in Europæ terminos momento unius horæ transivi. Victor utriusque regionis post no- num regni mei , post vigesimum atque octavum ætatis annum , videorne vobis in excolenda gloria , cui me uni devovi , posse cessare ? Ego verò non decreo ; & ubi- cumque pugnabo , in theatro terrarum or- bis esse me credam. Dabo nobilitatem ignobilibus locis ; aperiam cunctis gentibus terras , quas natura longè submoverat. In his operibus extinguere me , si fors ita fe- ret , pulchrum est : cæ stirpe sum genitus , ut multam prius , quàm longam vitam de- beam optare. Obsecro vos , cogitate nos pervenisse in terras , quibus scæminæ ob vir- tutem celeberrimum nomen est. Quas ur- bes Semiramis condidit ! quas gentes rede- git in potestatem ! quanta opera molita est ! Nondum scæminam æquavimus gloriâ , & jam nos laudis satietas cepit ? Dii faveant ; majora adhuc restant. Sed ita nostra erunt , quæ nondum attigimus ; si nihil parvum

Auxerimus, in quo magnæ gloriæ locus est. Vos modò me ab intestina fraude, & domesticorum insidiis prætate securum: belli Martisque discrimen impavidus subibo. Philippus in acie tutior, quàm in theatro fuit: hostium manus sæpe vitavit; suorum effugere non valuit. Aliorum quoque Regum exitus si reputaveritis, plures à suis, quàm ab hoste, interemtis numerabitis.

226. Cæterùm, quoniam olim rei agitatz in animo meo, nunc promendæ occasio oblata est, mihi maximus laborum, atque operum meorum erit fructus, si Olympias mater immortalitati consecretur, quando-cunque excefferit vitâ. Si licuerit, ipse præstabo: si me præceperit sacrum, vos mandasse mementote.



O R A T I O

ALEXANDRI.

AD MILITES SEDITIONOSOS.

Alexander seniores militum in Græciam remittere statuerat, quindecim millia tantum retenturus. Totius exercitus æs alienum omne statim dissolvit. At milites postquam cognoverunt, alios mitti domum, alios retineri, vecordes, & disciplinæ militaris immemores, seditiosis vocibus castra complent, Regemque ferocius adorti, omnes simul missionem postulare cæperant. Quos Alexander hæc oratione increpuit.

227. **Q**uid hæc repens consternatio, & tam procax atque effusa licentia denunciât? Eloqui timeo; palàm certè rupistis imperium, & precariò Rex sum: cui non alloquendi, non noscendi monendique, aut intuendi vos jus reliquistis. Equidem quum alios dimittere in patriam, alios mecum paulò post deportare statuerim; tam illos acclamantes video, qui abituri sunt, quàm hos, cum quibus præmissos subsequi statui. Quis hoc est rei? dispari in causâ idem omnium clamor est! Pervelim scire, utrùm qui discedunt, an qui retinentur, de me querantur. Crederes uno ore omnes sustulisse clamorem; ita pariter ex tota con-

cione responsum est, Omnes queri. Tum ille, Non Hercule, *inquit*, potest fieri, ut adducar querendi simul omnibus hanc causam esse, quam ostenditis, in qua major pars exercitus non est; utpote quum plures dimiserim, quàm retenturus sum. Subest nimirum altius malum; quod omnes avertit à me. Quando enim Regem universus exercitus deseruit? Ne servi quidem uno grege profugiunt dominos; sed est quidam in illis pudor à cæteris destitutos relinquendi.

218. Verùm ego tam furiosæ consternationis oblitus, remedia insanabilibus conor adhibere. Omnem Hercule spem, quam ex vobis conceperam, damno: nec ut cum militibus meis (jam enim esse desistis) sed, ut cum ingratisissimis oportet, agere decrevi. Secundis rebus, quæ circumfluunt vos, insanire cœpistis, obliti statûs ejus, quem beneficio exuistis meo: digni Hercule qui in eodem consenescat; quoniam facilius est vobis adversam, quàm secundam regere fortunam.

219. En tandem Illyriorum paulò antè & Persarum tributariis Asia & tot gentium spolia fastidio sunt. Modò sub Philippo feminudis, amicula ex purpura sordent: aurum & argentum oculi ferre non possunt: lignea enim vasa desiderant, & ex cratibus scuta, rubiginemque gladiatorum. Hòc cultu nitentes vos accepi, & quingenta talenta æris alieni; quum omnis regia suppellex haud ampliùs quàm sexaginta talentorum esset: meorum operum fundamenta; quibus tamen (absit invidia) imperium maximæ terrarum parti imposui.

230. Asiæne pertæsum est, quæ vos gloriâ rerum gestarum Diis pares fecit? In Europam ire properatis Rege deserto, quum pluribus vestrum defuturum viaticum fuerit, ni æs alienum luissem: nempe in Asiatice præda. Nec pudet profundo ventre devictarum gentium spolia circumferentes, reverti velle ad liberos conjugesque; quibus pauci præmia victoriæ potestis ostendere. Nam cæterorum, dum etiam spei vestræ obviâ istis, arma quoque pignori sunt. Bonis verò militibus cariturus sum, pellicum suarum concubinis: quibus hoc solum ex tantis opibus superest, in quod impenditur.

230. Proinde fugientibus me pateant limites; faceffite hinc ociùs: ego cum Persis abeuntium terga tutabor. Neminem teneo: liberate oculos meos, ingratisfimi cives. Læti vos excipient parentes, liberiue sine vestro Rege redeuntes! obviâ ibunt desertoribus transfugisque! Triumphabo mehercule de fuga vestra, & ubicumque ero, expetam pœnas; hos, cum quibus me relinquitis, colendo, præferendoque vobis. Jam autem scietis & quantum sine Rege valeat exercitus, & quid opis in me uno sit.

F I N I S.

INDEX

ORATIONUM

Secundæ Partis.

ALIÆ ORATIONES EX LIVIO COLLECTÆ.

| | |
|-------------------------------------------------------------------------------------|--------|
| ORATIO P. Scipionis ad juvenem Principem, quum ei sponsam redderet. | Pag. 3 |
| Oratio P. Scipionis ad sediciosos milites. | 5 |
| Oratio Q. Fabii Maximi in Senatu, ne Scipio in Africam cum exercitu mitteretur. | 11 |
| Oratio P. Cornelii Scipionis Q. Fabio respondentis. | 18 |
| Oratio Locrensiſum Legatorum in Senatu, de injuriis Q. Pleminii. | 24 |
| Oratio Annibalis ad Scipionem, de pace. | 30 |
| Oratio Scipionis Annibali respondentis. | 34 |
| Oratio M. Porcii Catonis Consulis, pro lege Oppia. | 36 |
| Oratio L. Valerii, Tribuni plebis, pro mulieribus, contra legem Oppiam. | 43 |
| Oratio Scipionis Africani ad Legatum Antiochi. | 48 |
| Oratio Legatorum Antiochi, pacem à Romanis postulan- tium. | 49 |
| Oratio P. Scipionis Legatis Antiochi respondentis. | 50 |
| Oratio Legatorum Rhodiorum in Senatu, ut Græcis Asiæ civitatis libertas daretur. | 52 |
| Oratio Cn. Manlii ad milites. | 56 |
| Oratio Philippi, Macedonum Regis, cum sederet Judææ inter duos filios. | 59 |
| Oratio Persei accusatoris in Demetrium fratrem. | 62 |
| Oratio Demetrii sese purgantis. | 67 |

ORAT. EX CORNELIO TACITO COLLECTÆ.

| | |
|------------------------------------------------------------------------|----|
| ORatio Germanici Cæsaris ad sediciosos milites. | 75 |
| Oratio M. Hortali, subsidium rei suæ familiari pos- centis. | 78 |
| Oratio Tiberii Cæsaris Hortalo respondentis. | 79 |
| Oratio Germanici morientis ad amicos. | 80 |
| Oratio Tiberii in Senatu, de Pisone & ipsius accusato- ribus. | 81 |
| Litteræ Tiberii ad Senatum, de luxu, quem coerceri jam posse negat. | 83 |

INDEX.

| | |
|-------------------------------------------------------------------------------------------------------------------|-----|
| <i>Oratio Cremutii Cordi, accusati regnante Tiberio, quod editis annalibus M. Brutum et C. Cassium laudasset.</i> | 86 |
| <i>Oratio Tiberii, templum sibi in Hispania extrui vetantis.</i> | 88 |
| <i>Oratio M. Terentii Equitis Romani, ob Sejani amicitiam res.</i> | 90 |
| <i>Oratio Senecæ ad Neronem.</i> | 92 |
| <i>Responsio Neronis ad Senecam.</i> | 94 |
| <i>Oratio Pati Thraseæ, ne pro Prætoribus, prove Consulibus grates apud Senatum à provincialibus ageretur.</i> | 96 |
| <i>Oratio Capitonis Cossutiani, Neronem in Thraseam instigantis.</i> | 98 |
| <i>Oratio Galbæ Imperatoris ad Pisonem, cum eum adoptaret.</i> | 99 |
| <i>Oratio Pisonis ad milites in Othonem.</i> | 102 |
| <i>Oratio Othonis ad milites.</i> | 105 |
| <i>Oratio Muciani Vespasianum ad capeffendum imperium adhortantis.</i> | 108 |
| <i>Oratio Galgaci Britannos ad pugnam erecto animo capeffendam adhortantis.</i> | 111 |
| <i>Oratio Agricola suos adhortantis ante pugnam contra Britannos.</i> | 114 |

ORATIONES EX Q. CURTIO COLLECTÆ.

| | |
|-------------------------------------------------------------------------------------------------------|-----|
| <i>Oratio Charidemæ ad Darium.</i> | 117 |
| <i>Verba Charidemæ, cum ad supplicium duceretur.</i> | 119 |
| <i>Verba Alexandri graviter ægrotantis.</i> | 120 |
| <i>Oratio Legatorum Darii.</i> | 121 |
| <i>Oratio Alexandri, Legatis Darii respondentis.</i> | 122 |
| <i>Oratio Darii ad milites jamjam propè Arbēlam pugnaturos.</i> | 124 |
| <i>Oratio Euthymonis ad Græcos factè à Persis mutilatos, ne in patriam redire velint.</i> | 128 |
| <i>Oratio Darii in concilio.</i> | 130 |
| <i>Oratio Alexandri ad amicos, de suscipienda in Scythas expeditione.</i> | 132 |
| <i>Oratio Scytharum ad Alexandrum.</i> | 134 |
| <i>Oratio Callisthenis Philosophi adversus Cleonem, qui divinos honores Alexandro haberi jubebat.</i> | 137 |
| <i>Oratio Alexandri, milites ad penetrandum in interiora Indis cohortantis.</i> | 139 |
| <i>Responsum Cæni, unius inter primarios exercitus duces.</i> | 143 |
| <i>Oratio Alexandri ad amicos, ne tam sese in aperta pericula immitteret orantes.</i> | 145 |
| <i>Oratio Alexandri ad milites seditiosos.</i> | 148 |

Finis Indicis.



005802699